

Romanos

Paulo Roma macainare Jesu yainare joarocaha

¹ Yũhũ Paulo mũsare Roma macainare joarocaja. Yũhũ jija Jesucristo cahamacũno. Tiro yũhũre beseri jire. To ya noaa buheare buhe duti warocahtiro cjihtore yũhũre cũri jire tiro.

² Tí buheare noaa buheare panopũ Cohamacũ “Yahui tai nija”, nia tiha. To ã ni yahuriro seheta to yare yahu mũhtaina cjiri panopũ macainare to yahuhtire to ya pũi joa dutiha. ³ Tí buheata to macũnore yahua jira. Tiro masũno waro jiro taro, Davi cjiro panamino ji turiariro jiha tiro. ⁴ Jesucristo mari pũhtoro Cohamacũ macũno ñaa buhiri marieriro to jiare õ sehe ñori jire Cohamacũ. To yariari baharo Cohamacũ to tuaa mehne tirore masa wijaachũ yoari jire. ã yoaro Jesucristo potocãta Cohamacũ macũno to jiare ñori jire Cohamacũ masare. ⁵ Tirota sãre pja ñũno sãre to yare buhe dutiro warocare jipihtina Jesucristore wacũ tua ti ño payohti cjihtire. ⁶ ã jiro mũsa cãhũre Jesucristo yaina cjihtire beseha tiro.

⁷ Mũsare, Cohamacũ to cahĩnare, Roma macainare, to yaina cjihti yoare mũsare tiro. Mũsare jipihtinare ahri pũre joarocaja. ã jicũ Cohamacũ mari Pũcũ, mari pũhtoro Jesucristo mehne mũsare noa dutija. Tina ti yoadohoa mehne noano jiga mũsa.

Paulo Romapũre ñũno waha duaro nimaha

8 Ahrire yahu m̄htaihtja m̄sare: Jipihtia macari macaina Jesucristore m̄sa wacū tuarire masa yahuhre ȳh̄re. Ti ã ni yahuch̄ t̄hoc̄ “Noana”, nija Cohamac̄re. Jesucristo to yoado-horo mehne ã nija tirore. Cohamac̄re sini payoc̄ m̄sa ya cjihti c̄h̄re ã sini payorucuja. 9 Tiro ȳh̄re to dutich̄ to mac̄no ya buheare noaa buheare tuaro buhec̄ to cahamac̄nota jija ȳh̄. ã jiro m̄sa ya cjihtire Cohamac̄re ȳ ã sini pay-orucuch̄ tiro masina. 10 ã sini payoc̄ Cohamac̄ cahmach̄ mip̄ pinihtare m̄sa cahap̄ ȳ ñ̄i wahahto cjihto c̄h̄re sinija. Yoari pja m̄sare ñ̄ duac̄ ȳ wahahtore cohtai yoanocamaja ȳh̄. 11 Esp̄ritu Santo ȳh̄re to buheri cjiire m̄sare buhe turia duaja Jesure m̄sa wacū tua namohto cjihto sehe. ã jic̄ m̄sare tuaro ñ̄ duaja ȳh̄. 12 Jesure wacū tuaja mari. ã jic̄ m̄sare ñ̄ duaja Jesure mari wacū tuaa mehne p̄ bh̄h̄seheri mari cahma wahchech̄ yoahto cjihto sehe.

13 Ȳ coyea, ahrire m̄sa masich̄ cahmaja. Noaa buheare ȳ buheri baharo paye macari macaina m̄sa coyea judio masa jieraina c̄h̄ Jesure wacū tuare. ã jic̄ paȳ tahari m̄sa cahap̄ waha duamaha tina, Jesure ti wacū tuariro sehet̄ m̄sa mehne macaina c̄h̄ ti wacū tuahto cjihto sehe. ã waha duapaihta waha masiera t̄hi ȳh̄. 14 Jipihtinare noaa buheare buhero jiro nina ȳh̄re. Buheinare, buhemahnoeraina c̄h̄re, masiinare, masieraina c̄h̄re buhehtiro cjihto jii nija ȳh̄. 15 ã jiriro jic̄ m̄sare Roma macainare noaa buheare tuaro buhe duaja.

Noa buheare masa t̄hoa Jesure wacū tua

dúcara

¹⁶ Noaa buheare tãhoa Jesure wacũ tua dúcara masa. ã jiro jipihtinare Jesure wacũ tuainare Cohamacũ to tuaa mehne pichacapũ wahaborinare yũhdora. Ti ã yũhdũchũ masicũ ahri buheare noaa buheare bũo tiro marieno yahuja. Ahri buheare judio masa tũho mũhtari jire. Ti baharo, judio masa jieraina cũhũ tũho turiari jire. ¹⁷ Ahri buhea õ sehe ni yahura: Jesure wacũ tuainare “Ñaa buhiri marieina, noaina jira”, ni ñũna Cohamacũ. Tirore wacũ tuaina dihtare ã ni ñũna Cohamacũ. Ahri panopũ ti ni joariro seheta jira: “ ‘Noaina jira’, to ni ñũina Cohamacũre wacũ tuaina dihta jira. ã wacũ tuaa, to ya catia mehne ã catirucuahca tina”, ni joaa tiha.

Masa ti ñaa yoari buhirire yahuha Paulo

¹⁸ Cohamacũ mũanopũ jirirore masa ti yũhdũrcarire, ti ñaa yoari cũhũre ñũno, ti ã yoari buhiri tina mehne suara. Tó sehe jiina barore to buhiri dahrehtore masichũ yoara tiro. Masa ti ñaa yoaa mehne painare noaa buheare tũhoerachũ yoara tina sehe. ¹⁹ Cohamacũ to basi to jia tiare masichũ yoaha. To ã yoachũ Cohamacũre masichũ mijoerara masare. ²⁰ Cohamacũre mari ñũerapachũta mũano macariro to jia tiare, tuariro to jia cũhũre to basi masichũ yoara tiro. Ahri yahpare to bajuamehneri baharo jipihtia to bajuamehnerire ñũa “Cohamacũ to yoari cjiri jira ahri” nia, Cohamacũ to jia tiare masina masa. ã jia masa Cohamacũre masipahta ã ñaare yoarucua, buhiri tira. “Mũhũre masierahi. ã jicũ ñaare yoahi”, ni masisi Cohamacũre. ²¹ ã jia Cohamacũ

to jia tiare masipahta tina tirore ño payoerara. Ñ jia tiro tinare to noano yoapachata tina sehe “Noana”, nierara tirore. Ñ tũho masieraina jia, wiho jia macaare, ñaa dihtare tũhoturucuina baro jira tina. ²² “Tũho masiina jija”, nipahta tũho masieraina wahara tina. ²³ Ñ wahaa Cohamacũre ã jirucurirore tina ño payoerara. Ñ ño payoeraa, ti ño payoboriro sehere cohtota, wiho jia masũri sehere “Cohamacũ jira”, ti nia masũri sehere ño payora. Wiho jia masũri sehere yariahtina masa masũrine, ã yoa minichahca masũrine, chihchõina masũrine, wahiquina masũri cũhũre “Cohamacũ jira”, ni ño payora tina.

²⁴ Ti ã yoachũ ñũno “Ti mũ sũro ñaare goa pja, yoawahnojaro”, nino Cohamacũ cohãnocare tinare. To ã cohãri baharo tina ñabiaro, pjĩro bũoro wahachũ yoare cahma yoarucura ti basi. ²⁵ Ñ jia Cohamacũ ya sehere cahmaeraa, mahña sehere noano tũhora tina. Cohamacũ ya sehere mahña yoaro sehe jichũ yoara tina. Potocãta Cohamacũ warore jipihtiare bajuamehnerirore jipihtia dachoripe noano ño payoro cahmana. Wiho mejeta tina sehe tirore ño payoerara. Ñ tirore ño payoeraa, Cohamacũ to bajuamehneri cjiri, wiho jia sehere ño payora tina.

²⁶ Ti ã ño payochũ ñũno “Ti mũ sũro goa pja, yoawahnojaro”, nino Cohamacũ cohãnocare tinare. Ñ jia tina numia mũa mehne manũ tiboina cohtota, ti basi numia dihta ñano yoara ti pjacũri mehne. ²⁷ Ti yoaro seheta jiina mũa cũhũ numia mehne namo tiboina jipahta, tíre cohtota, mũa ti basita ti pjacũri mehne ñabiaro yoara. Ñ yoaa,

ti basita ti ñano yoari buhiri ti pjacuri sehe ñano yuhdura.

28 ã Cohamacure ti cahmaerari buhiri Cohamacu tinare cohãre. To ã cohãchũ tina sehe ñano wacũrucu, ñano yoarucura. 29 ã jia tina tuaro ñano yoarucura. Numia mehne ñano yoarucuina, mũa mehne ñano yoarucua numia, ñaare goa pjarucuina, paina yare tuaro cahmaina, painare ñano yoarucuina, paina paye baro ti cjachũ ñũa goa pjaina, masare wajãina, cahma sayoina, mahñoina, masare ñũ tuhtiina, ñaa quiti dahreina, 30 paina ti yoaerapachũta ñano ni yahuwajaina, Cohamacure ñũ tuhtiina, painare purĩno yuhtiina, “Sã sehe masi yuhdurũcũ sũja”, ni tuhotuina, painare ã ni yahuina, paye ñaare yoa dũcaina, ti pũcũsumare yuhtieraina, 31 tuho masieraina, ti nino seheta yoaeraina, masare ne cahĩeraina, ti basi cahma susini duhueraina, ne pja ñũeraina jira tina. 32 ã ñano yoarucuinare Cohamacu pichacaru cohãnohca. To ã cohãhtire masipahta tina tí ñaare ã yoarucura. ã jia paina tinare ñũ cũ ti yoaro seheta ñano ti yoachũ ñũa, “Mari yoaro seheta ñano yoara”, ni wahchera tina.

2

Masare buhiri dahre dutiro tíre quihõno yoarohca Cohamacu

1 “Tina ñabiaina jira”, ni yahuwajaena tjiga painare. Mũa cũhũ ti yoaro seheta yoara. “Ñaare yoaeraja sã. ã jina buhiri maeraja”, ni masierara mũa. Mũa yahu wajaina yoaro seheta ñaare yoana, mũa cũhũ mũa basita buhiri

dahre dutina nica. ² Tó sehe yoainare Cohamacu to buhiri dahrechcu potocãta quihõno to buhiri dahrechcu masija mari. ³ Painare “Buhiri tiaha”, ni yahu waja ti yoaro seheta mûsa yoachcu, mûsa cûhure buhiri dahrerohca. ã jina “Sãre buhiri dahresi”, ni tûhotuboca mûsa. Jierara. Mûsa cûhure buhiri dahrerohca tiro. ⁴ Mûsa ñano yoapachuta Cohamacu mûsare pja ñano, dói waro buhiri dahrerara. ã jina “Cohamacu yûhu mehne suasi”, ni tûhotuboca mûsa. Jierara. Cohamacu mûsare pja ñano, dói waro buhiri dahrerara mûsa ñaa buhiri tiare cahyachcu ñu duaro, tirore mûsa yûhtichcu cahmano. ⁵ ã buhiri dahre duaeraparota, mûsa Cohamacure yûhti duaerachcu, mûsa ñaa buhiri tiare mûsa cahyaerachcu, buhiri dahrerohca mûsare. Tó pano mûsare to buhiri dahreboriro yûhdoro tí to buhiri dahrehti dacho waropure ñano, tuaro waro mûsare buhiri dahrerohca Cohamacu. Quihõno buhiri dahrerohca. ⁶ Cãinare ti yoa wapataro seheta yoarohca Cohamacu. ⁷ Cãina noaare yoarucuina jira. Tina Cohamacure noano wahchechcu yoa duaina, jipihtia dachoripe Cohamacu mehne ji duaina jira. Tina pinihtare dachoripe tiro mehne jirucuchcu yoarohca Cohamacu. ⁸ Wiho mejeta paina sehe tina yoaro sehe jierara. Tina ti mûsaro jia ti, ñaare goa pja yoarucuina baro jira. Cohamacu ya warore cahmaerara. Tina mehne Cohamacu tuaro sua, buhiri dahrerohca. ⁹ Jipihtina ñano yoaina ñano yûhdûahca. Judio masare ãta waha mûhtanohca. Tuhsu, judio masa jieraina cûhure ãta waharohca. ¹⁰ Jipihtina noaare yoaina

sehere Cohamacu “Noana”, ninohca. ã jia masa tinare ño payoahca. ã jiro tinare noano jichu yoarohca Cohamacu. Judio masare ãta waha muhtanohca. Tuhsu, judio masa jieraina cãhure ãta waharohca.

¹¹ Cohamacu judio masare, ã jichu judio masa jieraina cãhure jipihtinare cãno sehe ñuna. Mari yoarire ñuno, quihõno besera jipihtinare, ñaina, noaina cãhure. ¹² Paina Cohamacu Moise cjirore to dutia cjirire masieraina sehe buhiri tiare ti yoachu, to dutiare ti masierapachuta tinare buhiri dahrerohca Cohamacu. ã yoa tí dutiare masiina cãhure buhiri tiare ti yoachu, tí dutiare ti yuhduhcari buhiri buhiri dahrerohca Cohamacu.

¹³ Cohamacu dutiare tuhopahta yuhtierainare “Buhiri marieina, noaina jira ahrina”, ni ñuerara Cohamacu. To dutiare yoaina sehere “Noaina jira”, ni ñuna tinare Cohamacu. ¹⁴ Judio masa jieraina Cohamacu Moise cjirore to cãri dutia maerapahta, ti mu sũro noaare yoaa, Cohamacu dutiare yoaa nina. ã yoaa Moise cjirore to dutiare joari pũre cãaerapahta tina ti mu sũro to dutiare masina. ¹⁵ ã jia to dutiare ti tuhotuapũ potocãta cãara tina. ã cãaa ñaare yoaa dóicãta ti ñaa yoarire masina tina. ã jiro ñaare yoariro “¿Dohse jiro baro ñaare yoari yuhu?” ni tuhutura tiro. ã jiro noaare to basi to yoari cãhure masina tiro. ¹⁶ ã jiro Cohamacu Jesucristore to warocahti dachoi masa ti yoarire ti yahu duaerarire Jesucristo masi pahõno, tiro tinare beserohca noaina, ñaina cãhure. Tó sehe yoarohca tiro noaa buhea to nino sehetã. Ahrita jira masare yu buhea.

Cohamacu Moise cjirore to dutirire yahuha Paulo

¹⁷ MUSA sehe judio masa jina, Cohamacu Moise cjirore to dutiare ño payoina jina, “Cohamacu to yaina jija”, ni tũhotumana mUSA. ¹⁸ ã jina Cohamacu dutiare masiina jina, to cahmaare masina mUSA. ã masiina jina, “Noaare sã yoahtore bese masija sã”, ni tũhotumana mUSA. ¹⁹ ã ni tũhotuna õ sehe ni tũhotu namona mUSA: “Painare ne masierainare noano masichu yoaja sã. Tinare sã buherachu ne Cohamacure masieraboia tina. ã jia ñaare duhueraboia”, ni tũhotumana mUSA. ²⁰ ã jina “Tũho masierainare noaare yoa dutiina, macanacã cũhure buheina jija sã”, ni tũhotumana mUSA. ã jina “Cohamacu dutiare cjuana, potocã jiare masi pahñoja sã”, ni tũhotumana mUSA. ²¹ ¿ã jina painare buheina jipanahta, dohse yoana mUSA sehe mUSA buheriro sehe yoajerari? ¿Painare yaca dutieraina jipanahta dohseana mUSA sehe yacajari? ²² ¿Pairo namono mehne ñano yoa dutieraina jipanahta dohseana mUSA sehe pairo namono mehne ñano yoajari? “Cohamacu jira”, ti nia masurine ñu yabiina jira mUSA. ¿ã ñu yabiina jipanahta dohseana tí masurine ti ño payoa wũhũsepu sãa yacajari mUSA? ²³ “Cohamacu Moise cjirore to dutiare cjuaja sã”, niina jipanahta to dutiare yũhdũrucara mUSA. ã yũhdũrucana Cohamacure ño payoerachu yoana nica mUSA painare. ²⁴ ãta nina Cohamacu yare ti joari pũi: “Cohamacu dutiare mUSA yũhdũrucari buhiri judio masa jieraina sehere Cohamacure ti ñano durucuchũ yoara mUSA judio masa”, ni joaa tiha

Cohamacu yare ti joari pui.

²⁵ “Cohamacu yaina jija”, ni tūhotura cāina judio masa mahanocā cahsarocāre yihsoina. Cohamacu yare ti yoachu judio masa ti jichu noa nina. To yare ti yoerachu judio masa ti jia tia yaba cjihti jierara. Yihsoina ti jia tia cāhu yaba cjihti jierara. ²⁶ Ā jiro judio masa jieraina mahanocā cahsarocāre yihsoeraina ti jipachuta, Cohamacu dutiare ti yoachu ñuno “Yu yaina masata jira”, ni ñuna Cohamacu tinare. Judio masa sehere to ā ni ñaboriro seheta judio masa jieraina sehere ā ni ñuna. ²⁷ Payu judio masa Cohamacu Moise cjirore to dutiare cjuapahta tīre yoerara tina. Ā jia paina judio masa jieraina sehe mahanocā cahsarocāre yihsoeraina jipahta to dutiare yoara. Ā yoaina jia judio masa ti ñano yoarire masichu yoaa nina. ²⁸ Mipure judio masuno waro to jiare yahuihtja musare. To pjacure mahanocā cahsarocāre yihsoriro jiparota Cohamacure ño payoeraro potocāta judio masuno waro jierara. ²⁹ Cohamacu yairo Espiriture cjuariro tirore yūhtiro tiro tjira judio masuno waro. Ā yoa to pjacure mahanocā cahsarocāre to yihso cohāriro seheta to ñaa yoare duhura tiro. To mu sūro dutiare yoariro jieraparota Espiritu Santo to yoadohoa mehne to ñaa yoare duhura. Tó sehe yoarirore “Noariro jira”, ni ñuna Cohamacu sehe. Masa sehe tirore ti ā nierapachuta, ā nina Cohamacu sehe.

3

¹ ¿Yu ā nichu judio masa ti jia tia wiho waro jijari, masa tūhotuchu? Ne wiho waro jia nierara. ¿Co-

hamacũ judio masare to dutiriro seheta ti pjacũre mahanocã cahsarocãre ti yihso cohãa wiho waro jijari, m̃sa tũhotuchũ? Ne wiho waro jia nierara. ²Judio masa ti jia tia wiho waro jierara. Cohamacũ yare ti joari pũre judio masare cũ m̃htaha. ã jia judio masa ti jichũ noa nina tinare. ³ã jia cãina judio masa Cohamacũre ti tũhoerapachũta to niri cjiri potocãta jira. ã jiro to ni cũriro seheta yoarohca tiro. ⁴ãta jira. Jipihina masa mahñoina ti jipachũta Cohamacũ sehe ne mahñoerara. Panopũ to yare yahu m̃htariro cjiro to ni joariro seheta ne mahñoerara Cohamacũ. Õ sehe ni joaa tiha:

“Potocã niriro jira m̃hũ Cohamacũ.

M̃hũre ã jia masa ‘Cohamacũ quihõno yoerara’,
ni masierara m̃hũre”,
ni joaa tiha panopũ.

⁵Õ sehe ni tũhotuboca masa: “Mari ñaare yoana Cohamacũ noaare to yoariro jichũ masichũ yoaja. ã jiro ñaare mari yoachũ noa nina. ¿To ã noaa jipachũta dohsearo tiro mari ñaare yoari buhiri buhiri dahremacanocajari?” ni tũhotuboca masa. Masa ti tũhotuboriro seheta ã nii nija. ⁶Tó jierara ti ã ni tũhotuchũ. Mari ñaa yoari sehe noaa jichũ Cohamacũ mari ñaare yoari buhiri buhiri dahre masieraboa.

⁷Masa sehe mahñoina jira. Cohamacũ sehe ne mahñoerara. ã jina masa ti mahñoichũ ñna Cohamacũ sehe ne mahñoerariro to jichũ noano ñũ masija mari. ã jia masa mahñoa, Cohamacũ to mahñoerariro to jiare ñoa niboca tina. ãta ni tũhotumana cãina. ã ni tũhotua ò sehe ni tũhotu namomana tina: “Sã mahñoa mehne Cohamacũ

to mahñoerariro jiare ñona nija. Ñ ñona noano yoana nija. Ñ jia sã mahñoa noa nina. ¿Sã mahñoa noaa nichu dohse jiro baro sã mahñori buhiri sãre buhiri dahremacanocãbocari Cohamacu?” ni tuhotumana cãina masa. ⁸ Ñ jia õ sehe ni mahñoa cãina sãre: “Ñano yoana Cohamacu to noariro jichu ñona nica. Ñ jina ñano yoajihna’, nihre Paulo cãhu”, ni mahño yahusãna sãre cãina. Ti ã niri buhiri tinare Cohamacu buhiri dahrerohca. Ñta yoaro cahmana tinare.

Jipihtina buhiri tiina jija mari

⁹ ¿Ñ yoa dohse ni tuhotujari masa? ¿Mari judio masa paina yãhgoro noaina jijari mari? Jieraja mari. Judio masa, judio masa jieraina cãhu ñaa buhiri tia cãuaina dihta jija mari. Ñ jina jipihtina buhiri tiina jija mari. Ñta jira. Jipihtinare yu buheriro seheta jira. ¹⁰ Panopu to ni joariro seheta jira ahri: Ñ sehe ni joaa tiha:

“Ne cãiro masano noariro mariahna, Cohamacu to ñuchu.

¹¹ Jipihtina masa tuho ñahaeraina dihta jira.

Tuhsu, jipihtina masa ne Cohamacure macaeraina jia, tirore wacũ payoerara.

¹² Tina Cohamacu yare cohãa jipihtina ñaare yoaina wahare.

Ne cãiro noaare yoariro pinihta mariahna.

¹³ Ti duseri masa copari ti pjõo dapori yoaro sehe jira.

Ti durucuhu, masa copari urãa wijaaro sehe mahñoa dihta ti duserire wijaara.

Ñ durucua agã duseroi to ñima purãa wijaaro seheta purño ti durucua wijaara ti duserire.

14 Tina painare ñano durucuina, purĩno durucuina jira.

15 ã jia sua ñaina dóicãta masare wajãina jira.

16 Nohoi ti waharoi tina masare ñano yoa, ñano yuhduchu yoara tinare.

17 Tó sehe jia paina masa mehne tina noano jierara.

18 ã yoa Cohamacure ne ño payoerara”, ni joaa tiha panopure.

19-20 Cohamacu jipihtiare to joa na dutiri cjirire sãre judio masare cũha. ã jiro tó sehe to ni joariro cjiro mari cãhure dutisinina. “Buhiri mariaha sãre”, ni masieraja mari. ã jina mari jipihtiro macaina judio masa, ã jichu judio masa jieraina cũhu to buhiri dahrehtina mari jia tiare masija mari. ã jina buhiri tiina mari jiare masina, “Noaina jija sã”, ni masieraja Cohamacure. Cohamacu to yoa dutia sehere ne mari yoaeraja. ã jiro to dutia sehe buhiri tiina mari jia tiare masichu yoara marine. ã masina, õ sehe ni masieraja mari: “Cohamacu dutiare yoa pahñohi. ã jiro Cohamacu marine ‘Noaina jira’, ni ñuna”, ne ni masieraja mari jipihtiro macaina.

Cohamacure noano mari wacũ tuana to yaina wahaja mari

21 Wiho mejeta mipure Moise cjirore to dutiri cjirire yoa pahñono marieno masare ti ñaa buhirire to cohãrire masichu yoara marine Cohamacu. Moise cjiro to joari cjiri mehne, Cohamacu yare yahu mũhtaina cjiri ti joari cjiri mehne yahu cũ mũhta tuhsaha ahrire.

22 Jipihtina Jesucristore wacũ tuainare, tirore

tuhoinare “Noaina jira”, ni ñuna Cohamacu. Tó sehe cãno potori ñuna tiro jipihtina dohse jiina Jesucristore wacũ tuainare. ²³ Mari jipihtina ñaare yoaina buhiri tiina dihta jija. ã jina Cohamacu to cahmano sehe mari jiboriro dahsa yuhdãara. ²⁴ Mari ã jiina jipachuta Cohamacu marine pja ñuna. ã jiro Jesucristo sehe mari ñaa buhirire wapabasari jire. To ã wapabasaro mehne “Buhiri marieina noaina jira”, ni ñuna Cohamacu marine. ²⁵ Panopu macaina cjiri buhiri tiina ti jipachuta Cohamacu dóicãta buhiri dahreraha tinare. ã buhiri dahreraro ti buhiri tiare wiho waro ã tuhhotunocano nieraha. Baharo tiro Jesucristore warocari jire mari ñaa buhiri yariahtiro cjihtore, to di mehne mari ñaa yoarire wapabasahtiro cjihtore. Jesucristore mari wacũ tuachu Cohamacu sehe mari ñaa yoari buhirire borohca. Ahrire yoaro, quihõno yoariro to jia tiare masichu yoaro niha. ²⁶ ã yoa mipu cãhure quihõno yoariro to jia tiare masa ti masichu cahmana tiro. Quihõno yoariro jira tiro. ã jiro Jesure warocari jire masa ti ñaa buhiri yariahtiro cjihtore. ã jiro Jesure wacũ tuainare, “Buhiri marieina, noaina jira”, ni ñuno, quihõno yoaro nica.

²⁷ ¿Mipure “Noaina jija mari”, ni masicari mari masa tuhotchũ? Tíre ne ni masieraja mari. ¿Dohseana ã ni masieracari mari? ¿Cohamacu to dutiare yoana, “Noaina jija”, ni masibocari mari? Jierara. Tí cãhure ni masieraja mari. Mari ã ni masierapachuta Jesure mari wacũ tuachu “Noaina jira”, ni ñunohca marine Cohamacu. ²⁸ Õ sehe masija mari: Jesure mari wacũ tuachu ñuno

marine ñu jicoara Cohamacu. ã jiro marine “Buhiri marieina, noaina jira”, ni ñu tiro. To dutiare mari yoari wapa ã ni ñuerara. Tirore mari wacũ tuachu ã ni ñu.

²⁹ Tuhsu, Cohamacu judio masa puhtoro dihta jierara. Judio masa jieraina puhtoro cãhu jira tiro.

³⁰ ã jiro Cohamacu cãirota jiro jiro, jipihtina bui puhtoro jira. ã jiro jiro judio masare, ã jichu judio masa jieraina cãhure Jesure ti wacũ tuachu, tinare cãno potori “Buhiri marieina, noaina jira”, ni ñunohca Cohamacu. ³¹ ¿ã jina Jesure wacũ tuana Cohamacu Moise cjirore to dutiare cohãna nibocari mari? Cohãeraja mari tãre. Jesure wacũ tuaina jina, Cohamacu dutiare yoa pahõna nija mari.

4

Abrahã Cohamacure to wacũ tuarire yahuha Paulo

¹ Mari ñuchu cjiro panopu macariro Abrahã cjirore Cohamacu õ sehe yoaha: ² Abrahã cjiro noaare to yoapachuta “Noariro jira”, ni ñueraha Cohamacu tirore. ã jiro noaare yoaparota ñariro jisino “Yuhu pini noariro jija”, ni masieraha Abrahã, Cohamacu to ñuchu. ³ Cohamacu yare ti joari pũ õ sehe nina: “Abrahã Cohamacu to nirire to quihõno tãho ñaha, tirore to wacũ tuachu ñu Cohamacu tirore ‘Potocãta noariro jira’, ni ñu”, ni yahura Cohamacu yare ti joari pũ. ⁴ Puhtoro dahrainare waparo, wiho waro to pja ñu mehne waparo nierara. Ti dahrari wapa tinare waparo nina. ⁵ Wiho mejeta Cohamacure wacũ tuainare dahrainare ti waparo

sehe yoaerara Cohamacu. Cohamacure wacũ tuarirore “Noariro jira”, ni ñuna Cohamacu. To ã ni ñuchu tí noaa to yoari wapa jierara. Cohamacu sehe tirore cahmaeraina cjrيره tirore ti cahmachu ñuno buhiri marieina, noaina wahachu yoara. ã jiro masuno Cohamacure to wacũ tuachu ñuno “Noariro jira”, ni ñuna Cohamacu tirore. ⁶ ãta niha panopu macariro Davi cjiro. Masuno noaare to yoapachuta Cohamacu tirore “Noariro jira”, ni ñeraca. Tirore to wacũ tuachu ñuno pini Cohamacu tirore “Noariro jira”, ni ñuna. Cohamacu to ã ni ñurero wahcheare yahuha Davi cjiro. Õ sehe niha:

⁷ “Cohamacu ti ñaa yoarire to cohãchu masiina sehe tuaro wahchera.

⁸ ‘Noaina jira. Musa buhiri tiare wacũsi yuhu’, to nichu tũhoina tuaro wahchera”, niha Davi cjiro.

⁹ ¿Judio masa ti pjacure mahanocã cahsarocãre yihsorina dihtare ti ñaa yoarire boari Cohamacu? Jierara. Judio masa jieraina yihsoeraina cũhure ti ñaa yoarire bora tiro. Pari turi Abrahãre wacũga musa. Tiro Cohamacure to wacũ tuachu ñuno “Noariro jira”, ni ñuha Cohamacu. ¹⁰ ¿Dohse jichu ã yoari Abrahã, musa tũhotuchu? To pjacure mahanocã cahsarocãre to yihsohto panoputa tirore “Noariro jira”, ni ñuha Cohamacu. ã jiro yihso, to ñaa yoarire cohã tuhsuriroru yihsoha. ¹¹ ã jiro dóihta Cohamacure wacũ tua mũhtaha Abrahã. To ã wacũ tuachu ñuno “Noariro jira”, ni ñuha Cohamacu tirore. ã to wacũ tuaare, to yairo to jiare to ñohto cjihtore Cohamacu tirore to pjacure mahanocã cahsarocãre yihso dutiha. ã jiro Abrahã

to yihsohto pano Cohamacu sehe “Noariro jira”, ni ñu tuhsuha tirore. Tiro to yihsohto pano to ã ni ñariro seheta jipihtina Cohamacure wacũ tuainare judio masa jieraina yihsoerainare “Noaina jira”, ni ñuna Cohamacu. To ã ni ñaina ti jichu Abrahã ti ñuchuno cjiro waro yoaro sehe wahara. ¹² Tí yoaro seheta masa, yihsoina Cohamacure ti wacũ tuachu ti ñuchuno cjiro waro jia tiha Abrahã. Tiro to yihsohto pano Cohamacure wacũ tuaha. ã jia tiro yoaro seheta wacũ tuaina judio masa Abrahã panamana ji turiaina jira.

Cohamacu Abrahãre to ni cõrre “Potocã tjira”, niha Abrahã

¹³ Panopu õ sehe niha Cohamacu Abrahãre: “Ahri yahpare mure, mu panamana ji turiainapu cõhure waihtja”, ni yahu cõha Cohamacu Abrahãre. To dutiare to noano yoari wapa ã nieraha Cohamacu tirore. Abrahã Cohamacure to wacũ tuari wapa sehere ã niha Cohamacu tirore, “Noariro jira”, tirore to ni ñuri baharo. ¹⁴ “Cohamacu Moise cjirore to cõri dutia dihtare yoaro cahmana”, nina judio masa. Tó sehe niina Cohamacure wacũ tuaro marieno ahri yahpa jipihitirore na duara. Wacũ tuaro marieno ti nachu mari sehe Cohamacure mari wacũ tuua yaba cjihti jieraboa. ã jiro Cohamacu marine to ni cõri cjiro yaba cjihti jieraboa. ¹⁵ Moise cjirore to cõri dutia sehere yoerara masa. ã jiro to dutiare ti yuhdurucari buhiri masare buhiri dahrerohca Cohamacu. Wiho mejeta to dutia mariachu to dutiare yuhdurucaro cõhu mariaboa.

16 Ñ yoa Cohamacure wacũ tuaina dihta to wahtore naahca. Abrahã cjiro Cohamacure wacũ tuaha. Ñ jiro jipihtina tiro yoaro sehe Cohamacure wacũ tuaina ti ñuchuno waro yoaro sehe tjuara Abrahã cjiro. Ñ jiro “Ahrire mæsare waihtja”, Cohamacu nino jipihtinare tirore wacũ tuaina pinihtare nino niha. Ñ jia Cohamacu Moise cjirore to dutiri cjirore yoaina Cohamacure wacũ tuaina Cohamacu to wahtore naahca. Tina dihta nasi. Jipihtina Abrahã cjiro yoaro sehe Cohamacure wacũ tuaina cũh tinare to wahtore naahca. 17 Tíre Abrahã cjirore to niriro seheta joaa tiha panopure: “ ‘Payu macari macaina ti ñuchuno cjihto cũhi mæhure’, ni cũa tiha Cohamacu Abrahã cjirore”, ni joaa tiha panopu. Ñ jiro tiro Cohamacure wacũ tuaa tiha. Ñ to wacũ tuachu mari ñuchu cjiro yoaa tiha Cohamacu tiro cjirore. Cohamacu sehe yariainare masoriro, jipihtinare, jipihtia cũhure bajuamehneriro jira.

18 “Payu yahpari macaina mu panamana ji turina jiahca”, Cohamacu to ã ni cũchu Abrahã cjiro sehe pohna marieriro jiparota, “Potocãta jira”, ni tũhotua tiha. Ñ ni tũhoturo payu yahpari macaina mari ñuchu cjiro yoaro sehe wahaha tiro Cohamacu tirore to ni cũriro seheta.

19 Ñ jiro cien cũhmari cjuariro jiparota “Bucuro waro jija”, ni tũhotuparota, Sara to namono ne pohna marienicoro to jipachuta “Pohna ti masieraja sã”, ni tũhotueraa tiha Abrahã cjiro. Ñ jiro Cohamacu to ni cũrire “Potocãta jira”, nia tiha Abrahã cjiro. 20 “To niriro seheta yoaeraboca”, ne ni tũhotueraa tiha Abrahã cjiro. Ñ jiro tiro

Cohamacu to ni cūrire noano tūhoa tiha. To ã niare tūhotjiāhno “Cohamacu tuariro jira”, ni ño payoro nia tiha. ã jiro Cohamacure wacū tua namoa tiha tiro. ²¹ “Cohamacu to niriro seheta noano bihorohca”, ni tūhotu noano masia tiha Abrahā cjiro. ²² To ã masichu Cohamacure to wacū tuachu Cohamacu sehe “Noariro jira”, ni ñua tiha Abrahā cjirore. ãta ni joaa tiha Cohamacu yare ti joari pūi.

²³ ã yoa Abrahā cjiro dihtare ã ni joaeraa tiha. ²⁴ Tíre mari masihti cjihtire mari cūhure ã ni joaa tiha. ã jiro Cohamacure mari wacū tuachu “Noaina jira”, ni ñanohca mari cūhure Cohamacu. Tiro pini mari pūhtoro Jesu to yariachu masori jire tirore. ²⁵ Jesu sehe mari ñaa buhiri yariari jire. To yariari baharo masa wijaari jire tiro Cohamacu marine “Noaina jira”, to ni ñuhto cjihtore.

5

“Noaina jira”, Cohamacu to ni ñuchu õ sehe waharohca marine

¹ Jesucristore mari wacū tuachu ñuno “Buhiri marieina, noina jira”, ni ñua marine Cohamacu. To ã ni ñuchu Cohamacu mehne macaina marine jichu yoara mari pūhtoro Jesucristo. ² ã jina mari tirore wacū tuachu ñuno Cohamacu marine cahño, pichacapu wahaborinare yūhdore tiro mehne mari jihto sehe. Cohamacu pinihta noa yūhdariro jira. ã jiro tiro yoaro seheta jiina wahachu yoarohca marine tiro. To ã yoahti cjihtire noano masi, wahcheja. ³ ã yoa ñano yūhduna cūhu wahcheja mari. Ñano yūhduna, tíre cūno pja masija mari. ã cūno pjana, ñano yūhdūpanahta

noano Cohamacure wacũ tuaina waha namoja mari. ã jina Cohamacu yare duhueraja mari. ⁴ Mari ã yoachu ñno “Noana”, ni ñnohca Cohamacu marine. ã jina marine to yũdohtore noano masi, wacũ cohtana nija mari. ⁵ Ne wiho waro wacũ cohtana nieraja. Cohamacu marine to Espíritu Santore warocare mari mehne jihtirore. ã jiro Espíritu Santo sehe mari mehne jiro Cohamacu marine to ã cahĩrucuare masichu yoara. To ã masichu yoachu marine to yũdohto noano waro jiro nina. Potocãta yũhdunahca mari.

⁶ Tó pano mari ñaa yoarire mari basi mari yũhdu masierachu ñno, to quihõriro mu sachu, Cohamacure cahmaeraina mari jipachuta, Cristo sehe mari ñaa buhirire variabasaha. ⁷ Cãiro masano noariro jiparota variahtiro to jichu paio sehe to variaborirore cohtota, to variabasa duachu mijo yũhdunara. Noaa dihtare yoariro yaro jiborirore paio variabasaboca pa tehe nino. ⁸ Wiho mejeta Cohamacu sehe õ sehe yoara. Buhiri tiina mari jisipachuta mari yaro jiborirore Cristo variaha. To ã yoachu Cohamacu marine to tuaro cahĩare masija mari. ⁹ Mari yaro jiborirore to ñano di wijaa, yariachu Cohamacu sehe marine “Buhiri marieina, noaina jira”, ni ñna. To ã ni ñari baharo mipu pinihtare marine pichacapu wahaborinare yũdorohca Jesu. Marine to yaina wahachu to yoari baharo marine buhiri dahresi pichacapu Cohamacu. ¹⁰ Cohamacure ñu tuhtiina mari jipachuta, to macu sehe yariaro, mari ñaa buhiri tiare cohãno, Cohamacure mari ñu tuhtirire duhuchu yoare. To ã yoaro mehne

Cohamacu mari buhiri tiare bora. Tuhsu marine to yaina wahachu yoara. Mipuni pinihtare tí yuhdo curero yoarohca marine. To yaina mari jichu Jesu to masa mujari mehne marine pichacapu waha-borinare noano yuhdorohca tiro. ¹¹ Ña jina baharopu mari yuhduhtore masina wahcheja mari. Mipure ahri cūhure wahcheja. Mari puhtoro Jesucristo mari ñaa yoari buhirire to yariari baharo Cohamacu yaina jija mari. Ña jina wahcheja.

Adãore, Cristore yahuha Paulo Roma macainare

¹² Adão cjiro Cohamacure to yuhduhcari baharo ahri yahpare ñaa buhiri tia ji ducaha. Ñaa buhiri tia ji ducaro mehne masa yaria ducaha. Jipihtina mari ñaare buhiri tiare yoaja. Ña jina jipihina ñaina mari jiri buhiri yariaja. ¹³ Cohamacu to dutiare Moise cjirore to cūhto pano potocāta ahri yahpa macaina ñaa buhiri tiare yoaa tiha. Ti ã yoapachuta to dutia mariachu to dutiare ti yuhduhcari buhiri buhiri dahre masieraha. ¹⁴ To ã buhiri dahre masierapachuta Adão cjiro cūhu to baharo jiina cūhu tí dutia mariasinipachuta yariaa tiha. Moise cjiro to jihto pano tí dutia mariasinipachuta masa yariaa tiha. Paina ñano yoaa Adão cjiro ñano to yoariro sehe waro yoaera timaha. Ña jipahta tina cūhu yariaa tiha. Ña jiro Adão cjiro ñaare to yoa ducariro sehetā yoari pja baharopu ahri yahparu tariro noaare yo ducari jire.

¹⁵ Adão cjiro to yuhduhcari Cohamacu masare to pja ñua yoaro sehe jierara. Cohamacu to pja ñua sehe noa yuhduhara. Adão cjiro cūirota jiparota ñaare to yoa ducari buhiri payu masa yariaa tiha. Cohamacu sehe marine pja ñuno, Jesucristore

warocari jire. To ã warocach_u tiro cãirota jiriro pichacaru wahaborinare masare pay_u yuhdora. ¹⁶ ã jiro Cohamac_u masare to pja ñ_ua Adão cjiro to yuhdurucari yoaro seheta jierara. Adão cjiro sehe cãirota jiriro ñaare to yoari buhiri jipihtina masa ñaa buhiri tiina jira. ã ti buhiri tiina jipachuta masa pjíro ti ñaare yoapachuta mipure masare pja ñ_uno Cohamac_u ti ñaare bora. ã boro “Noaina jira”, ni ñ_una tiro tinare. ¹⁷ Adão cjiro cãirota jiriro ñaare to yoa ducach_u jipihtina masa yariarucura. Tí potocã tjira. To ã jipachuta ahri sehene wahchenahca mari. Mipure Cohamac_u masare pja ñ_uno Jesucristo cãirota jiriro to yariaro mehne ti ñaare boro, tinare “Noaina jira”, ni ñ_una. ã jia jipihtina to ã ni ñ_uina manop_u Cristo mehne puhtoia jahca.

¹⁸ Adão cjiro cãirota to jipachuta to yuhdurucari buhiri jipihtinap_u buhiri tiina waha ducaha. ã jia Cohamac_u to buhiri dahrehtinap_u tjuaha tina. Tó yoaro seheta Jesu cã_u cãirota jiparota noano yoaro jipihtina ti buhiri tiare cohã masina. Ti buhiri tiare to cohãch_u, “Buhiri marieina, noaina jira”, ni ñ_una tinare Cohamac_u. ã jia to ya catiare cjaa, ã catirucuahca tina.

¹⁹ Adão cjiro cãirota Cohamacure yuhdurucaha. To ã yuhdurucach_u, pay_u masa ñaa buhiri tiina waha. Tó yoaro seheta Jesu cã_u cãirota Cohamacure yuhtiha. ã yuhtiro, pay_u masa ti buhiri tiare cohã masina tiro. To ã cohãch_u “Ñaare ti yoari buhiri tia mariena, noaina jira”, ni ñ_una Cohamac_u tinare.

²⁰ Cohamac_u to dutiare Moise cjirore cãa tiha tí

mehne jipihtina masa ti ñaa buhiri tiare ti noano masihto cjihtore. Ñ jia masa ti ñaa buhiri tiare masia tí yuhdoro Cohamacu tinare tuaro to cahña tia cãhure masiahca. Tiro marine cahñ yuhduara. ²¹ Buhiri tiina ti jiri buhiri masa yariahtina jira. Ti yariari baharo, pichacapu wahaahca. Wiho mejeta Cohamacu masare cahñ yuhduara. Ñ tuaro cahño, mari puhtoro Jesucristo masare to yariabasaro mehne masare “Buhiri marieina, noaina jira”, ni ñuna. To ã ni ñuna sehe to ya catia mehne ã catirucuahca.

6

Yariaina cjiri ti ñaare yoareraro seheta Cristo yaina cãhu ñaare yoarucuerara

¹ ¿Dohse yoanahcari mari mipure, musa tãhotuchu? Cãina õ sehe niboca: Ñaare mari yoachu ñno Cohamacu mari ñaa buhirire borohca. ¿Cohamacu marire to cahñ namochu ñu duana ñaare yoa namobocari mari? ² Jierara. Ñaare yoaena tjijihna mari. Yariaina cjiri ñaare ti yoareraro seheta Cristo yaina jina mari cãhu ñaare yoarucu masieraja mari. ³ Jesu yaina mari jia tiare masa ti ñu masihto cjihtore copu bautisare marine paina. Ñ jina mari puhtoro Jesucristo to yariachu, mari cãhu tiro mehne yariaina seheta wahahi. ¿Tire masierajari musa? ⁴ Ñ bautisarina wahana Cristo pjacure masa copapu ti siõ sãa payo cohãriro seheta pano mari ñaa yoarire duhuja. Ñ jina Cohamacu to tuaa mehne Cristo to masa mujariro seheta mari cãhu to tuaa mehne mari jia tia cãhure, mari tãhotua cãhure cohtotaja. Ñ

cohtotana to yare wahma yoarucaina wahaja mari.

⁵ Cristo yaina jina, tiro mari pũhtoro mehne yariaina seheta jina, to masa mũjariro seheta mari cũhũ masa mũjanahca. Tí potocãta jira. ⁶ Cristo yaina ji dũcana crusapũ tiro mehne yariaina seheta wahai pari turi mari ñaare yoarucuerahto sehe. ã waharina jina ñaare yoarucuina ji namo duasi mari. Tíre mari masija. ⁷ Yariariro cjiropũre ñaare goa pjaa mariahna. ã jiro tiro cjiro ñaare to yoa duhuriro seheta tí ñaa sehe tirore to dutipe namoeraboro seheta tí ñaare duhura tiro. ⁸ Cristo mehne yariaina yoaro sehe jina, to masa mũjariro seheta mari cũhũ masa mũjanahca. “Tí potocã tjira”, ni tũhotuja mari. ã jina tíre mari masa mũjahtire wacũ cohtaja mari. ⁹ Cristo to yaria masa mũjari baharo ne pari turi yariasi. ã catirucuriro jira tiro. Tíre mari masija. ¹⁰ ã jiro Cristo cũ tahata yariaro, masa ti ñaa yoari buhirire cohãno taro yariaha. To masa mũjari baharo Cohamacũ to cahmano seheta yoarucuhtiro jira tiro. ¹¹ Tiro yoaro seheta mũsa cũhũ õ sehe ni tũhotuga: “Yariaina cjiri ti yoeraro seheta mari cũhũ ñaare yoa duaeraja. Jesu yaina jina Cohamacũ to cahmano seheta yoahatina cjihtita jina nija mari cũhũ”, ni tũhotuga mũsa.

¹² ã jina mũsa yariahtina jina ñaare yoarucuina jiena tjiga. ã jina mũsa ñaa yoaare goa pjapanahata tíre ã tũhotunocahga. ¹³ Ñaare yoaina jiena tjiga. Mũsare pichacapũ wahaborinare Jesu to yũhdorina jira mũsa. To ã yorina jina Cohamacũ cahmaa dihtare yoaina jiga mũsa. ã jina

noaare yoaina jiga m̄sa. ¹⁴ Mip̄re Cohamac̄ Moise cjirore to dutia mehne marine dutierara. Cohamac̄ marine cah̄no tiro sehe marine dutira. ã jina to yoadohoro mehne ñaare yoa duasi mari.

M̄sa ñaare yoarucuch̄ tí ñaa m̄sa p̄htoro yoaro sehe jira

¹⁵ ¿Ȳ ã nich̄ dohse ni t̄hotujari m̄sa? ¿Cohamac̄ sehere ȳhtihtina jina Moise cjirore to dutiare ȳhtihtina jierana, ñaare yoarucubocari mari? Jierara. ¹⁶ ¿Ahr̄re masierajari m̄sa? M̄sa noano ȳhtiriro m̄sa p̄htoro jira. ã jina to cahamaca jira m̄sa. M̄sa ã ȳhti m̄sa p̄htoro tiriro seheta ñaare yoarucuina m̄sa jich̄ tí ñaa yoaa m̄sa p̄htoro yoaro sehe jira. ã jina ñaare duhu masierara m̄sa. ã jiina jina pichacap̄ wahahtina jira m̄sa. Cohamac̄re noano ño payoina jina pinihta, to cahamaca jira m̄sa. ã jina to yaina noaina jira m̄sa. ¿Tíre masierajari m̄sa? ¹⁷ Panop̄ ñaare yoarucuina m̄sa jich̄ tí ñaa yoaa m̄sa p̄htoro yoaro sehe jimare. Mip̄ sehere noaa buheare t̄hona Jesure wac̄u tuana Cohamac̄re noano ño payoina wahare m̄sa. M̄sa ã wahach̄ ñna Cohamac̄re “Noana”, nija. ¹⁸ ã wahana mip̄re ñaa ti dutiriro cjiro seheta yoaerara m̄sa. ã jina Cohamac̄ cahamaca jina noaa sehere yoara m̄sa. ¹⁹ Cahamaca ti p̄htoare ti noano ño payoare masi pah̄ona m̄sa. ã jic̄ tí m̄sa masiri mehne tí mehne piti dahre buhehi m̄sare ahri buheare noano masieraina m̄sa jich̄ ñ̄c̄. Panop̄ ñaare yoarucuina jimare m̄sa. M̄sa ã yoarucuriro seheta mip̄ sehere noaare

yoarucuina jiga m̄sa. ã jina Cohamac̄ cahmaa dihtare yoanahca m̄sa.

²⁰ Panop̄ ñaa dihtare yoaina jina, noaa sehere yoaera tire m̄sa. ²¹ ¿Tí p̄jap̄re ñaa dihtare yoana dohse jirore wapatarí m̄sa? Tí m̄sa ñaa yoarire wac̄na mip̄re b̄no tica m̄sa. Tí ñaare m̄sa yoari buhiri pichac̄p̄ wahaboa m̄sa. ã jina ñaare yoana ne wapataerara. ²² Mip̄ sehere m̄sa ñaa yoarire duhuna Cohamac̄ cahamaca wahare m̄sa. ã jina Cohamac̄ cahmaa dihtare yoaina jinahca. ã jina jipihtia dachoripe Cohamac̄ mehne jirucunahca. ²³ Ñaare mari yoari buhiri pichac̄p̄ wahahtina jija jipihtina mari. Mari ã jipach̄ta mari p̄htoro Jesucristore mari wac̄ tuach̄ ñano, jipihtia dachoripe tiro mehne marine jirucuch̄ yoarohca. Mari ã jirucuhtore ã wanocanohca.

7

Cohamac̄ Moise cjirore to dutiare yahu namoha Paulo tjoa

¹ Ȳ coyea, Cohamac̄ Moise cjirore to dutirire noano masina m̄sa. Mas̄no to catisinich̄ tí dutiare ȳhd̄h̄ca dutierara. To yariari baharo pinihtare tí dutiare yoaro mariahna. Tí c̄h̄re masina m̄sa. ² Õ sehe jira: Numinore to man̄no to catiro puro tiro mehne dihta ji dutira Cohamac̄ Moise cjirore to dutiri sehe. To ã dutipach̄ta to man̄no to yariari baharo ticoro sehe pairore man̄ ti masina. Ticoro tí dutia mehne ji namoerara. ³ ã jiro to man̄no to jipach̄ta ticoro pairore man̄ tiro, ñano yoaricoro jira. Wiho mejeta to

manuno to yariari baharopu pairore manu tiro, Cohamacu dutiare yuhdurucaerara ticoro ã yoaricoro. Ñ yoaro ñano yoaricoro jierara ticoro.

⁴ MUSA cūhu yu coyea Jesu yaina wahana, Jesu to yariachu, mUSA cūhu tiro mehne yariaina seheta wahare. Ñ jina yariaina cjirire dutia ti marieno seheta Moise cjirore to dutia to cūri cjiri mUSA cūhure mariahna. Tí dutia musare dutierara. To manuno to yariari baharo, pairore manu tiricoro yoaro seheta mUSA cūhu panopu musare dutimarire duhu, Cristo mehne jira, ticoro paio mehne to jiro seheta. Ñ jina mipure to yaina jira mUSA. Tiro sehe to yariari baharo masa mujari jire Cohamacu cahmaare mari yoahito cjihtore. ⁵ Panopu ñaare mari mu sūro yoaa timai. Ñ jina Cohamacu Moise cjirore to dutirire mari masiri baharo tí dutiare yuhduruca duamai. Tí dutia mariachu yuhduruca duaeraboa. Ñ jina tí dutiare mari masiri baharo ñaare tuaro yoamai mari. Ñ mari ñaare yoana mari pichacapu wahahtinata jia timai. ⁶ Ñ wahaborina jipanahta Cristo yaina jina mipure tí dutia mehne jieraja mari. Ñ jiro Espíritu Santo mari mehne jiriro marine noaa sehere cohtotachu yoara. To ã yoachu panopu macaa dutia muna dutia to joari cjiri tí mehne jieraja mari mipure.

To ñaa yoari cjirire yahuha Paulo

⁷ ¿Ñ jina Cohamacu Moise cjirore to dutirire dohse nibocari mari? ¿Tí to dutia ñaa jicari, mUSA tūhotuchu? Jierara. Tí yuhure to dutiri mehne ñaare masii. Ñ jicu to dutia mariachu ñaare masieraboa yuhu. To dutia õ sehe jira. “Paina yapure

tuaro cahmaena tjiga”, niha to dutia. Ti ã nierach_u paina yap_ure tuaro ti cahmari ti ñaa jich_u masieraboa y_uh_u. ⁸ ã jic_u tí dutiare y_u masiri baharo paina yap_ure tuaro cahmaa tii y_uh_u. Tí dutiare masierasinic_u paina yap_ure tuaro y_u cahmari ti ñaa jich_u masieraboa y_uh_u. ⁹ To dutiare y_u noano masiht_o pano ã t_uhotunocai. To dutiare y_u masiri baharo pinihta tuaro ñaare yoa duamai. ã jic_u pichacap_u y_u wahahtore masia tii. ¹⁰ ã jia Cohamac_u dutiare y_uhd_ur_ucaeraa masa tiro mehne noano jirucuboa. ã jia tí dutia sehe noano jirucuch_u yoabori dutia jipahta y_u y_uhd_ur_ucari buhiri y_uh_ure pichacap_u waha dutimare. ¹¹ ã jic_u ñaare yoa_u Cohamac_u Moise cjirore to dutiare y_uhd_ur_uca duamai. Ñaare goa pjariro jic_u noaare masierahi. Tí ñaa y_uh_ure dojomehnerere. ã jic_u noano masierahi. ã masierac_u Cohamac_u dutiare y_uhd_ur_ucai. ã jic_u to dutiare y_u masiri baharo y_u ñaa buhirire pichacap_u y_u wahabori_ore masii. To dutia mehne ã masii.

¹² ã jia Moise cjirore Cohamac_u to cūri dutia noaata jira. ã jia quihōno jiata nina tí dutia. ¹³ ¿ã jipahta marine tí noaa dutia sehe pichacap_u wahach_u yoajari? Jierara. Tó_u wahach_u yoaerara. Mari ñaa yoa sehe marine pichacap_u wahach_u yoara. To dutiare mari masiri baharo tí dutiare y_uhd_ur_ucana ñaare yoana masija mari. ã jina mari ñaina mari jiare masina mari pichacap_u wahahto cūh_ure masija mari. ã jina to dutiare masina mari y_uhd_ur_ucarire ti ñaa y_uhd_u jich_u masija mari.

¹⁴ Cohamac_u to dutiare Moise cjirore cūha. Tí to cūa noaa ti jich_u masija mari. Wiho mejeta y_uh_u

sehe paina yoaro seheta ñariro jija. Ñ jicuta ñaare yoarucuca yuhũ. ¹⁵ ¿Dohse waharo nijari yuhũre? Ne noano masieraja yũ yoaare. Yũ yoa dua sehere ne yoera, yũ tuaro yoa duaeraa sehere yoaja yuhũ. ¹⁶ Ñaare yoa duaerapaihta ñaare yoaja yuhũ. Tíre yoacũ Cohamacũ dutia noaa dutia ti jichũ masija yuhũ. ¹⁷ Ñ jicũ mipũre yuhũ waro tí ñaare yoeramaja. Wiho mejeta yũ tũhotuarũ jia ñaa tí sehe yuhũre ñaare yoachũ yoara. ¹⁸ Noaare tuaro yoa duapaihta ne bihoeraja. Ahri yahpa macariro jicũ yũ tũhotuarũ ñaa dihta jira. Ne noaa mariaputiara. Ñ jicũ noaare tuaro yoa duapaihta ne bihoeraja. Ñaa sehe yuhũre dojomehne mũjana. ¹⁹ Noaa yũ yoa dua sehere yoeraja yuhũ. Ñaare yũ yoa duaeraa sehere yoaja. ²⁰ Yũ yoa duaeraare yoacũ mipũre yuhũ waro tíre yoeramaja. Yũ tũhotuarũ jia ñaa tí sehe yuhũre ñaare yoachũ yoara.

²¹ Ñ jiro yuhũre õ sehe wahara: Noaare yũ yoa duapachuta yũ tũhotuarũ ñaa jira. Ñ jicũ noaa sehere ne yoa masieraca. ²² Cohamacũ Moise cjirore to dutirire yũ tũhotua mehne tuaro cahma, quihõno yoa duamaja. ²³ Ñ jicũ yuhũ ahrire yũ basi masija: Yũ tũhotua mehne noaare Cohamacũ dutiare yoa duaja. Ñ yoa duapaihta yũ basi ñaare tuaro yoa duaca. Yũ mũ sũro ñaare duhu masieraja yuhũ.

²⁴ Ñ ñaare duhu masieracũ pjacũoriro jija yuhũ. Ñaare yoacũ pichacaru wahaihca yuhũ. Cuenah. ¿Yuhũre pichacaru waha dutia ñaare noa yuhũre yũhdobasabocari? ²⁵ Jesucristore yũ wacũ tuachũ

tiro sehe ñaa yu yoari buhirire yuhdobasarohca. To ã yoachu Cohamacure “Noana”, nija yuhu. Ñ jicu mipure yuhu yu basi yu tãhotua mehne Cohamacu dutiare quihõno yoa duamaja. Ñ yoa duariro jipacũta yu pjacu mehne yu mu sũro ñaare duhu masieraja.

8

Espíritu Santore cjuaina ti jia tiare yahuha Paulo

¹ Mipure Jesucristo yainare ti buhiri tiboro mariaha. ² Ñ jiro Jesucristo yairo yu jichu Espiritu Santo ã catirucuhu yoariro ñaare yuhdurucachu yoara yuhure. Ñaare yuhure yuhdurucachu yoaro yuhure pichacaru wahaborirore yuhdore tiro. ³ Cohamacu Moise cjirore to dutiare mari mu sũro ne yoa pahõosi. Ñ yoa pahõerana yuhdurucaina jija mari. Ñ jina tí dutia yoaa mehne ne yuhdusi mari. Mari ã jiina jipacũta õ sehe Cohamacu marine yuhdorohca. To macunore mari yoaro seheta pjacu tihtirore warocaha, mari buhiri tiare buhiri tihtiro cjihtore, marine yariabasahtiro cjihtore. Ñ jiro mari tãhotuapũ jia ñaare tiro duhuchu yoari jire. ⁴ Ñta yoare Cohamacu dutiare to tuaa mehne mari bihohto cjihtore. To dutiare bihoina jina mari mu sũro jieraja. Espiritu Santo to yoadohoa mehne to dutiro seheta yoaja mari.

⁵ Ñaare yoa duaina, tí dihtare goa pjara. Espiritu Santo to dutiro seheta yoarucaina sehe tí to dutia dihtare wacũ nuu, yoa duara tina. ⁶ Ñaa dihtare goa pja, wacũ nuuina pichacaru wahaahca.

Espíritu Santo to cahmano seheta tuaro yoa du-
 aina sehe jipihtia dachoripe Cohamacu mehne ã
 catirucuahca. Ñ jia tina Cohamacu mehne noano
 jinocaahca. ⁷ Ñaa dihtare goa pja, wacũ nuñina
 Cohamacure ñu tuhtira. Tina Cohamacu dutiare
 ne yuhtierara. To dutiare yuhti duaerara. Yuhtia
 cãhu bihoeraboa tina. ⁸ Ñ jia ti mu sũro yovina
 Cohamacure wahchechu yoa masierara.

⁹ Wiho mejeta musa sehe musa tuhotuapu jia
 ñaare yoaerara. Espíritu Santo musa mehne to
 jichu to cahmano seheta yoara musa. Ñ jia
 Espíritu Santore cjaeraina sehe Cristo yaina jier-
 ara. ¹⁰ Musa sehe to yaina jira. Musa ñaa buhiritã
 musa pjacuri yariara. Ñ musa pjacuri yariahtina ji-
 panahta Cristo musa mehne to jichu tiro mehne to
 ya catia mehne ã catirucunahca musa. Cohamacu
 musare “Buhiri marieina, noaina jira”, to ni ñuchu
 musa tiro mehne ã jirucunahca. ¹¹ Cohamacuta
 Jesure masori jire. Ñ masoriro jiro Espíritu Santo
 mari mehne to jirucuchu mari yariari baharo Co-
 hamacu mari cãhure masonohca. Ñ masono wah-
 maa pjacuri wahachu yoarohca marine. Jesure to
 masoriro seheta masonohca mari cãhure.

¹² Yu coyea, to ã yoachu ñuna ñaa mari goa
 pjarire yoaena tjijihna. ¹³ Mari ñaare yovina jina,
 pichacapu wahahtinata jinocanata nija. Espíritu
 Santo to yoadohoa mehne ñaa yoaare duhuna,
 jipihtia dachoripe Cohamacu mehne jirucunahca.

¹⁴ Jipihtina Espíritu Santore yuhtiina Cohamacu
 pohna jira. ¹⁵ Espíritu Santo mari mehne to ji
 ducachuta Cohamacu pohna ji ducãi. Wiho mejeta
 tiro marine dutipe, dahrachu yoah tiro jierara.

Ã jina panopu mari cuiriro sehe mipu sehere mari cuieraja. To pohna jina, Espiritu Santo to yoadohoa mehne mipure “Yu Pucu”, nija mari Cohamacure. ¹⁶ Ã jiro Espiritu Santo mari wacũaru marine õ sehe ni masichu yoara: “Potocãta Cohamacu pohna jija mari”, ni masichu yoara. ¹⁷ Ã jina to pohna jina, Cohamacu jipihtiare to pohnare “Waihtja”, to nirire mari sehe cjuanahca. Jesucristo cãhu cjuã, mari cãhu cjuanahca tíre. Cristo yare mari yoari buhiri ñano yãhdũina jina mari tiro mehne mũanopu noano wahchea mehne jinocanahca. Ã jina Cohamacu to pohnare to “Waihtja”, to nirire cjuanahca mari Cristo mehne.

¹⁸ Mipure ahri yahpai ñano yãhdũsinija mari. Baharopure mari mũanopu noano jinocanahca. Ã jina mipure ñano yãhdũna, pjíro cahya tãhotuena tjijihna. Ahri mari ñano yãhdũã wiho waro jira. Baharo noano jinocanahca Cohamacu mehne. Ã jina tuaro wahchenahca. Ahri pini wiho waro jierara. ¹⁹ Cũ nuũũ Cohamacu to pohnare cohtotarohca. Buhiri marieina, yariaerahtina, noaina waro jichu yoarohca marine. Mari ã wahachu jipihitia Cohamacu to bajuamehneri cjiri cãhu wahma dihta cohtota pihtia wahaahca. ²⁰ Jipihtiropure to bajuamehneri noaa ti jiborire dojomehneha masũno ñano yoa dũcaro. Ti mũ sũro ã wahaeraha. Masũno Cohamacure to yãhdũrucaro mehne to bajuamehneri ã wahaha. Ã jiro Cohamacu to bajuamehneri cjirire ãta ñano ji dutisiniha. Baharo to bajuamehneri cjirire noaa wahachu yoarohca tjoa tiro. ²¹ Ã jiro Cohamacu to bajuamehneri cjirire baa pihtiborire noaa wahachu

yoarohca tjoa. Cohamacu pohnare noaina to wahachu yoariro seheta, tinare noano to yuhdoriro seheta noaa wahachu yoarohca Cohamacu to bajuamehneri cjirire cūhare. ²² Jipihtia Cohamacu to bajuamehneri cjiri ñano ti ji ducari baharo ñano yuhduha tiha. Numino niji wahcõno to ñano yuhduro seheta to bajuamehneri cūhu dachoripe ñano yuhducuru. Tíre mari masija. ²³ Ñ yoa mari cūhu to bajuamehneri cjiri yoaro seheta ñano yuhduja. To yaina mari wahachu, Cohamacu to yairo Espíritu Santore dóihta ware marine. Ñ jina “ ‘Waihtja’, to niriro seheta sohtori tirohca”, ni masija mari. Ñ jina noaa sehere marine to cohtotahtore tuaro waro cohtaja. Ñ yoa to pohna mari tiro mehne mari noano jihto cūhare tuaro cohtaja mari. Tuhsu, wahma pjacure marine to wahto cūhare tuaro cohtaja. ²⁴ Mari ñ cohtaina jichu, tirota marine pichacapu wahaborinare yuhdore. Tiro cahapu jirina jina tiro cahapure mari wahahatore cohtaeraboa mari. Marine to yuhdo tuhsuri baharo tíre cohta namoeraboa. ²⁵ Ñ jina to wahtire ñherapanahata Cohamacu marine to yuhdohtore cohtana, noano mehne ñ cohtarucuja.

²⁶ Ñ yoa Cohamacure wacū tuaera cureina to cahmaare noano masieraina jija mari Ñ jina tirore quihõno siniina cūhu jieraja mari. Wiho mejeta mari ñ jiina jipachuta, Espíritu Santo sehe marine yoadohora. Marine tuaro pja ñano mari ya cjihtire durucuro marieno to tuhotua mehne tiro Cohamacure tuaro sini payobasara. ²⁷ Cohamacu to cahmano seheta mari Jesu yaina ya cjihtire sini payobasara tiro Espíritu Santo. To ñ

sini payobasach_u Cohamac_u mari t_uhotuare masi pahñoriro jiro, Espíritu Santo to sini payobasaare masina.

Cristo to tuua mehne ñaa yoaare y_uhd_ur_ucanahca mari

²⁸ Ahrire y_u yahuhtire masija mari: Jipihtina Jesure cahñina mari jich_u to cahmaare yoahtinare besere marine tiro. ã jiina mari jich_u ñano Cohamac_u ã yoadohorucura marine. ã jina mari ñano y_uhd_ur_upanahta ñano y_uhd_ur_uucu dojoaeraja. ã jina Cohamac_u yoadohoro mehne noano jinahca mari. ²⁹ Cohamac_u marine to yaina cjihtire dóip_uta masi, bese tuhs_uha. ã besero to mac_uno Jesu to yoaro seheta jihtina cjihtire marine c_uha, pay_u masa to mac_uno_{re} mari wahmi tihto cjih_utore. ³⁰ Panop_u to yaina to ji dutirina mari jich_u, to pohna mari jihtina cjihti c_uh_ure beseha marine. ã jiro marine to beserinare tiro “Buhiri marieina, noaina jira”, ni ñ_ure. Marine to ã niinare tiro yoaro sehe jihtina cjihtire tiro mehne m_uanop_u noano jich_u yoarohca Cohamac_u.

³¹ Tíre masina õ sehe t_uhotuja mari: Cohamac_u marine to cahñinare ne paina ñ_u tuhtia bihosi. ³² Cohamac_u mari ya buhirire yariahtirore to mac_uno_{re} warocaha. “Y_u mac_ure cahñja. ã jic_u tirore warocaeraja”, nieraha tiro. Marine ã tuaro yoadohoriro jiro, jipihtia marine d_uhsarire wa pahñonohca. ³³ Cohamac_u to beseina mari jich_u, tiro marine “Ñaa buhiri marieina, noaina jira”, ni ñ_ure. Mari ã jiina jich_u paina marine “Ñaina jira”, ne ni yahusã masierara. ³⁴ Cristo

mari ya buhirire yaria masa mɔjaha. Mipure Cohamacɔ poto buhusehe sehei jira pɔhtoro jiro. ã jiro tiro mari ya cjihtire potocãta sini payoro nina Cohamacɔre. ã jia paina sehe marine ne buhiri dahre duti masierara Cohamacɔre. ³⁵ Cristo marine to tuaro cahĩchɔ paina tirore “Cahĩ tjia”, ne ni masierara. Cahĩ duhusi tiro. Mari ñano yɔhdɔpachɔta, mari cuipachɔta, paina marine ti ñano yoapachɔta, mari jɔca baapachɔta, suhti marieina mari jipachɔta, nu cuaroi mari jipachɔta, marine ti wajãpachɔta Cristo marine ã cahĩrucurohca. ³⁶ Cohamacɔ yare ti joari pũi mari ñano yɔhdɔhtore yahuro, õ sehe nina:

“Mɔ yaina sã jichɔ masa ñɔ jicoaeraa, ti wajãhtina ã jirucunata nija.

Oveja ti wajãhtina ti jiriro seheta sã cũhɔre ã wahara”,
ni joaa tiha Cohamacɔ yare ti joari pũi.

³⁷ ã jina mari ñano yɔhdɔpanahta Cristo marine cahĩriro to yoadohoro mehne tí jipihtiare yɔhdɔ witinahca. ã yɔhdɔna to yare ne duhusi mari. ³⁸⁻³⁹ Jesucristo yaina mari jichɔ ñɔno Cohamacɔ sehe marine tuaro cahĩna. ã jiro tiro marine ne cahĩ duhusi. Mari yariachɔ cũhɔre, mari catichɔ cũhɔre, mipure, baharopɔ cũhɔre, tiro marine cahĩ duhusi. ã yoa anjoa, watia pɔhtoa, ahri yahpa macaina pɔhtoa, mɔano macaina, ahri yahpa macaina cũhɔ marine Cohamacɔre “Mɔ yainare cahĩ tjia”, nia bihosi tina. Cohamacɔ to bajuamehneri cjiripure tirore marine ne cahĩ duhuchɔ yoaa mariahna. Marine ne tiro cahĩ duhusi.

9

Israe masa Cohamacu to beserina jira

1-2 Y_H coyeya Israe masare wacũc_H tuaro cahyaja. Cristore cahmaerara tina. ã jic_H ñano cahya ya-
 jeripohna tija y_HH. Tí y_H ã ni yahua potocãta jira. Y_HH Cristo yairo tjija. ã jic_H m_Hsare “Cahyaja”,
 y_H nia sehe potocãta jira. M_Hsare ã nic_H mahñoi
 nieraja. Espíritu Santo y_H ã mahñoe_rach_H masino,
 y_HH_{re} “Quihõno m_H cahyarire yahure m_HH” ni,
 y_HH_{re} masich_H yoare. ³ Israe masa y_H coyeya
 y_H ya yahpa macaina pichacap_H wahaahca. Co-
 hamac_Hre tinare y_Hhdo duti duac_H õ sehe ni dua-
 maca y_HH sehe: “Ti ya buhirire y_HH sehe picha-
 cap_H wahahtja. ã jiro ti yaro jiborirore y_HH
 sehere buhiri dahrejaro Cristo”, ni duamaca y_HH.
⁴ Tina y_H coyeya Israe cjiro panamana ji turiaina
 jira. Tinare to pohna cjihtire cũha Cohamac_H.
 Tuhs_H, to si sitea mehne ti watoi jia tiha. Tinare
 jipihtinare to noano wahach_H yoaa cãh_Hre yahu
 cũ m_Hhtaa tiha. Tuhs_H, Moise cjirore to dutiri
 cãh_Hre dóip_uta tinare Israe masareta cũ m_Hhtaa
 tiha. Tirore ti ño payohti macaa cãh_Hre tinareta cũ
 m_Hhtaa tiha. Tuhs_H, masare to y_Hhdohto cãh_Hre
 yahu cũa tiha tinare Cohamac_H. ⁵ Sã ya curuari
 waro doce curuari waro jira. Sã ñ_Hch_Hs_Hma ji
 m_Hhtarina cjirip_H ti panamana jia tiha. Ti pana-
 mana ji turiainap_H jija sã Israe masa. ã jiro
 mari yoaro sehe pjac_H tiroro taro, sã coyero Is-
 rae masano waro jire Cristo. Tiro Cohamac_Hta
 jira. ã jiro tiro jipihtina bui p_Hhtoro jira. Jipihtia
 dachoripe tirore noano ño payojihna mari. ã ño
 payorucujihna.

6 Paina Israe cjiro panamana ji turiaina jipahta Cohamacu yaina waro jierara. ã jina tina to yaina ti jierachu ñuna õ sehe ni tãhotuboca musa: “Israe masare yu yaina jichu yoaihtja’, niparota cãinare Cohamacu to niriro seheta yoaerara”, ni tãhotuboca musa. ã ni tãhotuena tjiga. 7 Õ sehe jira: Paina Abrahã panamana ji turiaina ti jipachuta “Abrahã panamana ji turiaina waro jira”, ni ñerara Cohamacu tinare. ã jiro õ sehe nia tiha Cohamacu: “Mu macu Isaa panamana ji turiaina tina pinihta potocãta mu panamana ji turiaina waro jahca”, ni yahu cãa tiha Cohamacu Abrahãre. 8 To ã ni yahu cãchu ahrire masinahca mari: Abrahã cjiro panamana jipihtina waro Cohamacu pohna jieraca. Cohamacu to ni cãrire noano tãhoina tirore wacũ tuaina sehe tinata jica Cohamacu pohna. ã jia tinata jira Abrahã cjiro panamana ji turiaina waro.

9 Õ sehe niha Cohamacu Abrahã cjirore: “Pacãhma ahri pja baroihta yu tjua tachu mu namo Sara wihãrirocãre cjãarohca mu macure”, nia tiha Cohamacu Abrahã cjirore. ã nino Cohamacu Abrahã cjiro macuno to masa bajuahtore yahu cãyuro nia tiha.

10 Baharo Isaa cjiro namono Rebeca wama tiricoro pãaro pohna tia tiha. Ti pãuro Isaa sã ñuchu cjiro jia tiha. 11-12 ã jia ti pohna ti masa bajuerasinipachuta, noaare, ñaa cãhure ti yoaerasinipachuta Cohamacu ti pocoro cjihtore õ sehe nia tiha: “To baharo sehe to wahminore dutirohca. ã jiro to pãhtoro jirohca”, nia tiha ticorore. Cohamacu to cahmano seheta besera

tiro. Ñ jiro jiro cãirocãre besero ticorore ãta ni yahua tiha. Ñ jiro masa ti yoaare ñæraparota to cahmano seheta tiro to yaina cjihtire besera. ¹³ Ñta ni joaa tiha to yare ti joari pũi: “ ‘Jacobó sehere cahãa tihí. Esaú sehere cahãera tihí’, niha Cohamacu”, ni joaa tiha panopu.

¹⁴ ¿Tíre wacũna dohse ni tãhotubocari mari? ¿Ti yoahtere ñæraparota cãirore ã besero Cohamacu quihõno yoaro nierabocari, m̄sa tãhotuchu? Jierara. ¹⁵ Õ sehe nia tiha Cohamacu Moise cjirore: “Diro yu pja ñu duarirore pja ñuhtja”, nia tiha tiro Moise cjirore. Ñ jiro cãirore ã besero quihõno yoaro niha Cohamacu. ¹⁶ Ñ jina mari m̄ sũro mari cahmano sehe Cohamacure marine pja ñuchu yoaeraja mari. Tuhsu, ne mari noaare mari yoari wapa cãhure marine pja ñærarara tiro. To m̄ sũro to pja ñu duaina sehere pja ñuna. ¹⁷ Egipto macaina puhtoro faraõ cãhure to cahmano seheta yoaa tiha tiro. Õ sehe nia tiha Cohamacu faraõre: “Egipto macaina puhtoro cjihtore cũi nii m̄hure yu tuare jipihtinare yu ñohto cjihtore. Tuhsu, jipihitia yahpari macaina yãhure ti masihto cjihtore puhtoro sõi nii yãhu m̄hure”, nia tiha Cohamacu faraõre. Tó seheta nina Cohamacu yare ti joari pũi. ¹⁸ Ñ jiro to pja ñu duainare to m̄ sũro pja ñuna tiro. Tuhsu, paina sehere to m̄ sũro yãhtierachu yoara tiro. To cahmano seheta yoara tiro.

¹⁹ To ã yoariro jichu ñuna yãhu sehere õ sehe niboca m̄sa: “Cohamacu marine to cahmano seheta to yoachu mari sehe tirore yãhdurucana bihosi. ¿Mari ã yãhdurucana bihoerapachuta dohse jiro baro marine buhiri dahre duajari tiro?” ni

susini sinituboca m̄sa ȳh̄ure. ²⁰ Tíre õ sehe ni ȳhtija m̄sare: ¿Masa wiho jiina jipanahta Cohamac̄ure tuhtijari m̄sa? Dihi biato dahrerirore “¿Dohseac̄u ȳh̄ure õ sehe jiri biato yoari m̄h̄u?” tí biato to ni sinituboriro seheta nina nica m̄sa Cohamac̄ure. Tó sehe ni masierara m̄sa. ²¹ Dihi biato dahreriro dihi mehne to yoa duaro seheta yoara. Ā yoaro c̄uria dihica mehne noaare c̄ühti biatore yoa masina tiro. Tia dihica mehneti wiho jiare c̄ühti biato c̄h̄ure yoa masina tiro. Tiro yoaro seheta Cohamac̄u c̄h̄u to yoa duaro seheta yoara.

²² Ā jiro Cohamac̄u pichac̄ap̄u to cohãhtinare ti ñaa yoarire to ñu yabiare, to tuua c̄h̄ure ñono taro, tinare dói buhiri dahre duamaha. Ā dói buhiri dahre duaparota, yoari pja ti ñaa yoare ā ñunocasiniha. Ā jiro tinare buhiri dahrerasiniha. ²³ Āta yoaha Cohamac̄u noabiariro to jiare, to tuua c̄h̄ure mari masihto c̄jhtore. Panop̄u marine to pja ñ̄ina c̄jhtire tiro beseri jire jipihtia to tuaare to noaa c̄h̄ure mari c̄j̄ahto c̄jhto sehe. ²⁴ Ā jina mari sehe to beserina jinata nija. Ā jia to beserina sehe c̄ina judio masa dihta jierara. C̄ina judio masa jieraina c̄h̄u jira to beserina. ²⁵ Āta nina judio masa jierainare Cohamac̄u yare Osea c̄jro to joariro seheta:

“Pano ȳu yaina jieraina c̄jri c̄h̄ure baharop̄u tinare ‘Ȳu yaina jira’, nihtja.

Ā yoa pano ȳu cah̄eraina c̄jri c̄h̄ure baharop̄u tinare ‘Ȳu cah̄ina jira m̄sa’, nihtja”, nia tih̄a Cohamac̄u.

26 “ ‘Y_u yaina jierara m_{usa}’, Cohamac_u to nia yahpari macaina tina Cohamac_u catiriro pohmata jahca”,

ni joaa tiha Osea cjiro panop_{ure}. 27 Tuhs_u, panop_u macariro Isaia cjiro c_uh_u Israe masare õ sehe ni yahua tiha: “Pjiri ma macaa pad_u yaparicãre mari quihõna bihoeraja. Israe masa tí yaparicã peri pay_u ti jiro sehe jiina ti jipach_uta mahainacã Cohamac_u y_uhdorohca tinare. 28 Cohamac_u ahri yahpa macainare pay_u masare to nino seheta cjero mehne potocãta buhiri dahre bahrañonohca”, nia tiha Isaia cjiro. 29 ã yoa pari turita Isaia cjiro õ sehe ni joaa tiha tjoa:

“Mari p_uhtoro jipihtina bui p_uhtoro mahainacã mari mehne macainare y_uhdoyeraro, marine judio masare jipihtinare butich_u yoaboa tiro.

Sodoma macainare, Gomorra macaina c_uh_ure to butich_u yoariro seheta mari c_uh_ure butich_u yoaboa tiro”,

ni joaa tiha Isaia cjiro y_u coyea Israe masare.

Judio masa noaa buheare cahmaeraha

30 ã tjira. ã jina ahrire masi namoga m_{usa}: Judio masa jieraina Cohamac_ure macaerapahta tirore bocare. Jesucristore ti wac_u tuach_u ñ_uno, “Buhiri marieina, noaina jira”, ni ñ_ure tinare Cohamac_u.

31 Wiho mejeta judio masa sehe “Cohamac_u dutiare mari yoach_u tiro marine y_uhdorohca”, nia Cohamac_u Moise cjirore to dutiare yoapahta, bihoerare. Ti ã bihoerach_u ñ_uno, Cohamac_u “Noaina jira”, ni ñ_uerare tinare. ã jia noaina ji duapahta bihoerare. 32 Õ sehe yoa, tina bihoerare:

Tina Cohamacuare wacũ tuaro marieno ti m̄ s̄uro Moise cjirore to dutirire yoa duamare, to yaina ji duaa. Mari piti dahre buhech̄u Cristo tãca yoaro sehe jirore jira. Ti m̄ s̄uro yoainare Cristo p̄ha tu borach̄u yoari tãca yoaro sehe jirore jira. M̄roca wahcãriro sehe tãcap̄u p̄ha tu, bora s̄u caharo to wacũ wahcãnop̄ure ne s̄uerara. (P̄ha tu borariro yoaro seheta tina Cristore tãca yoaro sehe jirore cahmaeraina Cohamacu cahap̄u ne s̄usi.) ³³ ãta ni joaa tiha Cohamacu yare ti joari p̄i:

“Jerusalẽ wama tiri macai p̄ha tu borach̄u yoari tãca yoaro sehe jirore c̄ja.

Mari piti dahre buhech̄u õ sehe jira: M̄roca wahcãriro tãcap̄u doca wahã s̄u bora s̄u caharo to wacũ wahcãnore s̄uerara.

Tãca yoaro sehe jirore cahmaeraina sehe tiare p̄ha tu bora, ti wacũ wahcãnop̄ure ti s̄ueraro seheta Cohamacu cahap̄u s̄usi.

Wiho mejeta tirore wacũ tuaina sehe tiro mehne ã wahcherucuahca”,
ni joaa tiha.

10

¹ Ȳu coyea, Israe masare pichacap̄u waha-borinare Cohamacu to ȳhdohtore, tuaro ȳu ya-
jeripohna mehne cahmasãamaja ȳh̄u. ã jic̄u Co-
hamacu tinare to ȳhdohto cjihtore sini payoja
ȳh̄u. ² Potocãta tina Cohamacu cahmaare tu-
aro yoa duamana. ã yoa duapahta to cahmaa
warore masierara. ³ Tuhs̄u, tinare Cohamacu to
noaina wahach̄u yoaborire tina t̄ho ñahaerare. ã
t̄ho ñahaeraa, ti m̄ s̄uro noaare yoa duapahta
bihoerare. Ti ã yoach̄u tinare Cohamacu to wacũ

tua dutiriro seheta ti yoaerach_u ñ_uno, tiro sehe tinare “Noaina jira”, ni ñ_uerare. ⁴ Wiho mejeta Cristore wacũ tuaina sehere “Noaina jira”, ni ñ_una Cohamac_u. Æ jina dutia yoa mehne y_uhd_ueraja mari. Cristo mehne y_uhd_uja.

⁵ Moise cjiro panop_u macariro õ sehe ni joaa tiha: “Cohamac_u to dutirire ne cãno d_uhsaro marieno mari yoa pahñoch_u Cohamac_u y_uhdorohca marine”, ni joaa tiha tiro. ⁶⁻⁷ To ã ni joapach_uta mip_ure masa Cristore ti wacũ tuach_u ñ_uno Cohamac_u tinare “Noaina jira”, ni ñ_una. Tí buhea noaina ti wahach_u yoari buhea õ sehe ni yahura: Cristo to basi ahri yahpap_u wihi tuhs_uri jire. Tuhs_u, masa m_uja tuhs_uri jire. Æ jina õ sehe ni t_uhotuena tjiga m_usa: “¿Diro sehe m_uanop_u Cristore na tabasaro wahabocari marine to y_uhd_uohto sehe? ¿Diro sehe yariaina cahap_u Cristore masobasa na tabocari? Tirore na taboriro mariahna”, ni t_uhotuena tjiga m_usa. ⁸ Õ sehe ni yahura Cohamac_u yare ti joari p_ui: “Cohamac_u ya buheare mari macach_u to buhea õi jira. To buheare masi tuhs_ura m_usa. Æ yoa to buheareta durucua tire m_usa”, ni joaa tiha. Tí buheare Cristore wacũ tuaa buheare masare yahuja sã. ⁹ Tí buhea õ sehe ni yahura: “Jesu mari p_uhtoro jira”, ni mari yahuch_u, “Cohamac_u Jesure yariariro cjirore potocãta masore”, ni mari wacũ tuach_u, Cohamac_u marine pichacap_u wahaborinare y_uhdorohca. ¹⁰ Jesure mari wacũ tuach_u Cohamac_u sehe marine “Noaina jira”, ni ñ_unohca. Jesure mari wacũ tuaare painare mari yahuch_u tiro marine pichacap_u wahaborinare

yuhdorohca.

¹¹ Õ sehe nina Cohamacu yare ti joari pui: “Cohamacure wacu tuaina tirore ti wacu tuaa mehne ne cahyasi”, niha Cohamacu yare ti joari pui.

¹² Judio masare, judio masa jieraina cuhare Cohamacu cuno pоторita yoadohora. Mari puhtoro jipihtina bui puhtoro jira tiro. A jiro tirore to yoadohoare siniinare jipihtinare noano waro yoadohorohca tiro tinare. ¹³ Õ sehe ni joaa tiha panopure: “Yu buhiri tiare cohãbasa, yuhure yuhdoga’, ni mari puhtorore masa ti sinichu tinare pichacaru wahaborinare mari puhtoro yuhdorohca”, ni joaa tiha Cohamacu yare.

¹⁴ Wiho mejeta masa sehe Cristore wacu tuaeraa, tirore a ni sini masierara tina. Tuhsu, to buhea cuhare tuhoeraa, tirore wacu tua masierara. A yoa to buheare yahuriro mariachu cuhare tire tina masisi.

¹⁵ Tuhsu, to buheare yahuhtinare Cohamacu sehe to warocaerachu to buheare yahu masierara. A ni joaa tiha Cohamacu yare ti joari pui: “Noa buheare yahuhtina ti tachu noano wahcheja mari”, ni joaa tiha panopure.

¹⁶ Ti a ni joari jipachuta masa payu noaa buheare tuho duaerara. Ata ni joaa tiha Isaia cjiro: “Yu puhtoro, tinare mari yahurire tina ne tuho duaerare”, ni yahua tiha Isaia cjiro Cohamacure.

¹⁷ A jia masa noaa buheare tuhoa Cristore wacu tuare. Ti tuhoa sehe noaa buhea sehe Cristo ya buhea waro jira.

¹⁸ A jicu ahrire õ sehe ni sinitu nu duaja musare: Israe masa Cohamacu yare tuhoerari, musa

tuhotuch_u? Potocãta tina tuhoa waro tuhomare.
 Āta nina Cohamac_u yare ti joari pũ cãh_u:

“Cohamac_u noa putiariro to jia tiare yahuina jipi-
 htirop_u yahu sitea wahare.

Ā jia jipihtiro macainap_u to yare tuho sahseare”,
 ni joaa tiha panop_ure. ¹⁹ Pari turi m_usare õ sehe ni
 sinitu ñ_u duaja tjoa: ¿Israe masa tuhopahta noano
 masierari tina, m_usa tuhotuch_u? Masia timaha
 tina. Ahrire yahu namoc_u Moise cjiro to nirire
 yahu m_uhtaihtja. Õ sehe ni joaa tiha tiro:

“Õ sehe ni yahura Cohamac_u Israe masare: ‘Tuho
 masieraina, ñaina jira”, ni m_usa ñaina se-
 here y_u yaina cjihti wahach_u yoaihtja.

Y_u ã yoach_u m_usa sehe tina mehne sua, tinare ñ_u
 tuhtinahca.

Ā yoac_u m_usare suach_u yoaihtja y_uh_u’, ni yahure
 Cohamac_u Israe masare Israe masa
 jierainare to yaina jich_u yoaro taro”,
 ni joaa tiha Moise cjiro. ²⁰ Tuhs_u, Isaia cjiro cãh_u
 cuiro marieno õ sehe nia tiha:

“Õ sehe nina Cohamac_u: ‘Y_uh_ure macaeraina sehe
 y_uh_ure bocahre.

Ā jic_u y_uh_ure cahmaerainare tinare y_uh_ure ma-
 sich_u yoahi y_uh_u’, nire Cohamac_u”,
 ni joaa tiha Isaia cjiro judio masa jierainare.
²¹ Tuhs_u, Israe masa sehere õ sehe ni joaa tiha
 Isaia cjiro: “Õ sehe nina Cohamac_u: ‘Tina y_uh_ure
 y_uhd_urcaina, y_uh_ure cahmaeraina jira. Ā jic_u
 tinare ti ñaare cahya dutic_u “Y_u yaina wahaga”, ã
 nirucumai tinare. Wiho mejeta tina sehe y_uh_ure
 ne y_uhti duaerare’, nire Cohamac_u”, ni joaa tiha
 Isaia cjiro.

11

*Mahainacã Israe masare pichacapu
wahaborinare yuhdorohca Cohamacu*

¹ ¿Ã jiro Israe masare Cohamacu to beseina cjiire cohãno niri tiro, mûsa tuhhotuchu? Jierara. Tinare cohãerare tiro. Yuhu cãhu Israe masuno, Abrahã panamino ji turiariroru jija. Benjami ya curua macariro jija yuhu. ² Panopure Israe masare to ya curua macaina cjihtire Cohamacu besea tiha. To ã beserinare cohãerare. Cohamacu yare ti joari pui Elia cjiro ya quitire yahura. ¿Elia cjiro Cohamacure sinino, Israe masare to yahusãrire masierajari mûsa? Õ sehe ni yahusãha tiro: ³ “Yu puhtoro Cohamacu, tina Israe masa mu yare yahu muhtainare wajãre. Tuhsu, tinata paina muhure ño payoa taa, wahiquinare wajã jũ muoa tuhuri cãhure cohãre. ã jicu yuhu dihta mu yairo duhsaja mipure. Yu ã jichu tuhoa yuhu cãhure wajã duara tjoa, mipure”, niha Elia cjiro Cohamacure. ⁴ To ã nichu tuhoro Cohamacu sehe õ sehe ni yuhtiha Elia cjirore: “Siete mil waro muu yu yaina jira mipure. Tinare wihboi yuhu. Tina yu yaina sehe Baal wama tiri masure ne ño payoera tire tina. ã jicu cuii tjiga muhu”, nia tiha Cohamacu Elia cjirore panopure. ⁵ Tí pjare Elia cjiro to jia tiri pjapure to yaina masare to beseriro seheta mipu cãhure mahainacã Israe masare to yaina cjihtire besere Cohamacu. Cohamacu tinare cahmano tinare pja ñuno besere. ⁶ Noaare ti yoari wapa tinare besero nierare. Tinare ã cahmano, pja ñuno besere. “Noaare mûsa yoari wapa mûsare besehtja” nino, tiro tinare potocãta pja ñuno nieraboa.

⁷ Ñ yoa ñ sehe jira: Israe masa Cohamacu tinare “Noaina jira”, to ni ñuchu yoa duapahta tina cãno pjaerare. Wiho mejeta Cohamacu to basi to berina sehe noaina to yaina wahare. Tirore cãno pjaeraina sehe to yare tuho duaerare. ⁸ Ñta nia tiha Cohamacu yare ti joari pui:

“Cohamacu tirore cahmaerainare to yare tuho ñahaerachu yoare.

Ñ jiro potocã jiare ti tuhopachuta tinare ne noano tuho ñahaerachu yoare Cohamacu.

Ñta jirucura tina mipu cãhure”,

ni joaa tiha panopure. ⁹ Ñ yoa panopu macariro Davi cjiro Israe masa Cohamacure ti cahmaerari buhiri ñ sehe nia tiha Cohamacure:

“Tina Israe masa ti bose numuri, ti wahchea numuri ti yuhdoro wato, yurica ñahñoriro to ñano yuhduro seheta tina cãhure ñano yuhduchu yoaga.

Tó sehe yoainare tinare ñano buhiri dahrega mahu.

¹⁰ Tuhsu, mu yahuare tinare ne tuho ñahaerachu yoaga mahu.

Ñ buhiri tirucuina ji, ñ cahyarucuina jijaro tina”, nia tiha Davi cjiro Cohamacure.

Judio masa jierainare pichacapu wahaborinare yuhdorohca Cohamacu

¹¹ ¿Judio masa Cristore ti cahmaerachu ñuno, Cohamacu tinare cohãno warota nibocari, musa tuhochu? Cohãsi tinare. Ñ cohãeraparota tina Cristore ti cahmaerachu mipure judio masa jieraina sehere Cohamacu yuhdorohca. Mipure tinare to yaina jichu yoare Cohamacu. To ñ yoachu ñna

cãina judio masa sehe tina mehne sua sayo, Cohamacu yainata ji duaahca. ¹² Judio masa ti yuhduꝛucachu ti noano yoaerachu paina sehere ahri yahpa macainare cãinare Cohamacu yuhdore. To ã yuhdochu tina sehere noano wahare. To ã yoariro yuhdoro, baharo judio masa sehe Cristore ti noano wacũ tua duꝛachu pinihtare ahri yahpa macainare jipihtiropure noaputiaro waharohca.

¹³ Mipure m̄sare judio masa jierainare yahui tai nija. Cristo cũre yuhure judio masa jierainare buhehtiro cjihtore. ã jia yu dahraa sehe wiho jia jierara. ¹⁴ To cũriro seheta yuh̄u m̄sare buheja, yu coyea judio masa sehere m̄sare ti ñu cũchu yoa duacu. Cohamacu yuhdorina m̄sa jichu ñua tina cũhu Cristore cahmaa, to yuhdoina wahaboca. ¹⁵ Judio masare cohãbo curero, judio masa jieraina sehere noaa buheare Cohamacu yahu dutire. Tí buheare ti t̄hori baharo Jesure ti wacũ tuari baharo cãina judio masa jieraina, jipihtiro ahri dacho macaina Cohamacu yaina wahare. ã jiro judio masare to cohãbo curechu noano wahare paye yahpari macaina sehere. To ã yoariro yuhdoro judio masa to cohãbo cureina cjiꝛire pari turi to yaina cjihti to yoachu pinihtare jipihtinapure ahri yahpa macainare noaputiaro waharohca. To yaina cjihti pari turi ti wahachu, jipihtinapu to yaina yariaina cjiꝛi sehe pari turi ti masaboro seheta jirohca.

¹⁶ Õ sehe jira: Trigo yub̄u mehne wahma pãoca ti yoaria Cohamacu yaria cjihto Cohamacure ti wachu, tiare ti yoa duhari yub̄u cũhu to yariata jira. Tuhsu, yuc̄acu nuhcori cũhu Cohamacu ya nuhcori

cjihti jia, t_u d_up_uri c_uh_u Cohamac_u yata jira. Õ sehe mari ni piti dahre buhech_u Abrahã sã ñ_uch_u cjiro Cohamac_u yairo to jiro sehetã to panamana ji turiainap_u c_uh_u Cohamac_u yaina jahca Cristore wac_u tuaina jia. Yoa d_uhari y_ub_u c_uh_u to yariata jica. Tuhs_u yuc_u n_uhcori c_uh_u Cohamac_u ya n_uhcori cjihti jia, t_u d_up_uri c_uh_u Cohamac_u yata jica. Õ sehe mari ni piti dahre buhech_u, Abrahã sã ñ_uch_u cjiro Cohamac_u yairo to jiro sehetã to panamana ji turiainap_u c_uh_u Cohamac_u yaina jira, Cristore wac_u tuaina jia.

¹⁷ Ti ã jihtina jipach_uta cãinare ti coyea sehere judio masare Cohamac_u cohãre. Olivo wama tid_u d_up_urire cãa d_up_urire to d_ute cohãboro sehetã cãina judio masa sehere Cohamac_u cohãre. ã yuc_u d_up_urire cohãno to cohãri d_up_uri jiro cjiroi paye d_up_urire n_uc_u macad_u olivoc_u d_up_urire cohtota duhu õhre. Tô yoaro sehetã Cohamac_u m_usare judio masa jierainare Abrahã panamana ji turiaina cohtotare m_usare, m_usa cãh_ure yãhdoro taro. ¹⁸ M_usare to ã c_uch_u “Judio masa yãhdoro noaina jija sã”, ni tãhotuena tjiga. Ahrire y_u yahuhtire wac_uga m_usa: Judio masa sehere bese m_uhtaha Cohamac_u. ã besero ti coyero cjihtore c_uha Cristore, m_usare yãhdoro taro. ã jina “Judio masa yãhdoro noaina jija”, ni tãhotuena tjiga m_usa.

¹⁹ M_usa judio masa jieraina sehe õ sehe niboca: “Cãa ñ_uaa d_up_urire to cohãboro sehetã Cohamac_u cãina judio masare cohãre. Paye d_up_urire cohtota to õno sehetã to yaina marine c_uno taro ã cohãre tinare”, niboca m_usa judio masare yãhd_uca du-

ana. ²⁰ Tí m̄sa nia potocãta jira. To ã jipachuta tina Jesure ti wacũ tuaerari buhiri Cohamacu cohãre tinare. ã jiro m̄sa cũhare Jesure m̄sa wacũ tuaerachu to yaina cjihti m̄sare cũerabo. ã jina “Judio masa yũdoro noaina jija sã”, niena tjiga m̄sa. ã nieranata “Cohamacu cua pisariro jira”, ni tahotuga m̄sa. ²¹ Olivocu ji m̄htaa d̄puri waro yoaro sehe judio masa sehe Cohamacu yaina ji m̄htaha. To cohtotaa d̄puri to õboro se-heta Cohamacu to yaina m̄sa sehere cohtota cũha. Wiho mejeta to yaina ji m̄htaina judio masa tirore ti wacũ tuaerachu, cãinare cohãre. Tinare to cohãriro sehetã m̄sa cũhare cohãnohca, tirore m̄sa wacũ tuaerachu. ²² Cohamacu m̄sare noano yoariro to jichu masiga m̄sa. Tuhsu, cua pisaro mehne buhiri dahreriro to jichu cũhare masiga m̄sa. Tirore ño payoerainare tiro buhiri dahrerohca. ã jiro tirore m̄sa ño payoerachu olivocu d̄puri warore to cohãriro cjiro sehetã m̄sa cũhare cohãnohca Cohamacu. ²³ ã yoa judio masa to cohãbo curerina cjiri Cristore ti wacũ tua d̄cachu ñno, olivocu d̄puri warore pari turi to duhu õno sehetã Cohamacu to yaina cjihti yoarohca tinare. Cohamacu to ã yoa masihti cjihtireta tuaare c̄uara tiro. ã jiro tiro tinare cãinare to yaina cjihti yoarohca. ²⁴ M̄sa judio masa jieraina jina, n̄cu macadu olivocu d̄puri yoaro sehe jira m̄sa. ã jiina m̄sa jipachu olivocu toad̄ni n̄cu macaa d̄puri to na ta õboro sehetã, Cohamacu m̄sare to yaina cjihti yoahre. To ã yoachu, ne mijoerare tirore. Judio masa Cohamacu to bese m̄htarina jira. Olivocu toadu d̄puri waro yoaro sehe jira

tina. Ā jiro ti jid_u waro cjirop_ure pari turi to duhu ōboro seheta to yaina cjihti pari turi judio masare to yoach_u, ne mijoerara tirore.

Baharo judio masare pichacap_u wahaborinare y_uhdorohca Cohamac_u

²⁵ Y_u coy_ea, ahrire masa ti masieraare m_usare yahuihtja. “Mip_ure sã dihtare besere Cohamac_u. Cohamac_u sã masi y_uhd_ur_uc_u s_uch_u ñ_uno, tiro sãre besere”, m_usa ni t_uhotuerahto sehe ahrire yahuihtja m_usare. Ō sehe jira: Mip_ure pay_u judio masa Cohamac_ure t_uho duasi. Wiho mejeta pay_u judio masa jierainare Cohamac_u to quihōriro puro to yaina to yoari baharo judio masa c_uh_u tirore cahma d_ucaahca. ²⁶ Ti ā cahmach_u judio masa pay_u warore pichacap_u wahaborinare Cohamac_u y_uhdorohca. Cohamac_u yare ti joari p_ui āta ni yahu joaa tiha:

“Jerusalē wama tiri macai judio masa ya macai tinare y_uhdohtiro tarohca.

Jacobo panamana ji turiainare ti ñaa yoari buhirire tiro cohānohca.

²⁷ Tinare y_uhdoc_u panop_u tinare y_u ni c_uriro seheta yoai nija’, nire Cohamac_u”, ni joaa tiha Cohamac_u yare ti joari p_ui.

²⁸ Mip_ure tina judio masa Cristo yare ño payoeraina Cohamac_ure ñ_u tuhtira. Ti ā yoach_u mip_ure m_usa sehe judio masa jieraina Cristore wacū tua d_ucare. Judio masa sehere Cohamac_u bese m_uhtari jire. Judio masa ñ_uch_us_uma cjiri to beserina ti jich_u mip_u jiina judio masa c_uh_ure tiro cahīna. ²⁹ Cohamac_u to ni c_uriro seheta tinare to beseriro seheta quihōno yoarohca tiro. To

nirire ne bosu tiro. ³⁰ Panopure m̄sa c̄h̄u Cohamac̄ure ȳhd̄ur̄cari jire. M̄ipure judio masa Cohamac̄ure ti ȳhd̄ur̄cach̄u ñ̄no tiro m̄sa sehere p̄ja ñ̄no ȳhd̄ore. ³¹ M̄ipure judio masa tirore ȳhd̄ur̄care. Ti ã yoapach̄uta Cohamac̄u m̄sare to p̄ja ñ̄riro seheta tina c̄h̄ure baharopure p̄ja ñ̄nohca. ³² Õ sehe jira: Jipihtina masare “Ȳh̄ure ȳhd̄ur̄caina jira”, nina Cohamac̄u. ã jiro jipihtina tirore ȳhd̄ur̄caina ti jich̄u ñ̄no jipihtinare p̄ja ñ̄ masina tiro.

³³ Cohamac̄u tua ȳhd̄ur̄c̄u s̄riro jira. Noano masi pah̄oriro jira tiro. ã jiro to t̄hotuare, to yoarire marine noano masihto basioerara. ³⁴ Õ sehe ni joaa tiha Cohamac̄u yare: “Cohamac̄u mari p̄htoro to t̄hotuare ne masa noano masierara. ã jia masa tirore ‘Õ sehe yoaga’, ni masierara. ³⁵ ã jia masa Cohamac̄ure paye barore ti wari baharo ‘Tiro marine wapamona’, ni masierara masa”, ni joaa tiha panopure. ³⁶ Cohamac̄u jipihtiare yoaa tiha. Tuhs̄u, to tuaa mehne jipihtiare jisnich̄u yoara tiro. ã jia jipihtia to ya jira. To ã jiriro jich̄u jipihtia dachoripe tirore ñ̄o payojihna mari. ãta yoarucujihna.

12

Cohamac̄u cahmaare marine yoarucu dutiha Paulo

¹ Cohamac̄u marine tuaro p̄ja ñ̄ure. To ã p̄ja ñ̄riro to jich̄u ñ̄na, ȳ coyea, m̄sa sehe oveja noarirore ti j̄u wa m̄oriro seheta Cohamac̄ure ti ñ̄o payoriro seheta m̄sa c̄h̄u tirore ñ̄o payorucuga, to yare m̄sa noano yoarucuhto sehe. M̄sa

ã yoach_u, tiro wahcherohca. Ñta yoaro cahmana marine, Cohamac_ure quihõno ño payona tana. Ñ jic_u m_usare tíre tuaro yoa dutija. ² Ahri yahpa macaina ñaare yoaina yoaro sehe yoaena tjiga m_usa. Ñ yoa m_usa t_uhotuap_ure Cohamac_u noaa t_uhotua sehere to cohtota, c_uch_u, y_uhtiga m_usa. Ñ y_uhtina, noaa sehere t_uho cohtotarina jinahca m_usa. Ñ yoana noaare, Cohamac_u cahmaare, ñaa mariare, potocã jiare masinahca m_usa.

³ Cohamac_u y_uh_ure to yare yoa masich_u yoariro buhe dutiro beseri jire y_uh_ure. Ñ jic_u jipihtina m_usare õ sehe ni t_uhotu dutieraja y_uh_u. “Noabiaina ji y_uhd_urucaja sã”, ni t_uhotuena tjiga. Ñ t_uhotunocahga. Jesure m_usa wac_u tuari baharo, Cohamac_u m_usa cãinare noaare yoa masihtire to c_uch_u, “To yoadohoro mehne ahri noaare yoaja”, ni t_uhotuina jiga m_usa.

⁴ Õ sehe ni yahu namoihtja y_uh_u m_usare. Mari wamomacari, mari dahpori, mari capari jipihtiro mari p_ujac_uí jia pay_u jira. Mari p_ujac_uí jia cã p_ujac_u jiparota soro jia dahraa c_uhara. ⁵ Tí jiro seheta soro sehe jia dahraare c_una Cohamac_u marine. Ñ jina pay_u masa jipanahta Cristore wac_u tuaina jina, to p_ujac_u cã p_ujac_u yoaro seheta cã curuata jija mari.

⁶ Cohamac_u marine to yoadohoro purota to tuaa mehne yoa dutira. Ñ yoaro marine cãinare soro jia mari yoahrtire c_una tiro. To ã yoach_u marine to c_urire mari sehe noano yoajihna. Ñ jia Jesu yaina õ sehe yoajaro. Cãinare Cohamac_u to yare yahuhtinare c_una. Ñ jia tina Cristore ti wac_u tuaro puro to yare noano yahujaro. ⁷ Cãinare Cohamac_u

m̄sare yoadohohtinare c̄na. ã jia tina m̄sare noano mehne yoadohojarō. C̄inare Cohamac̄u m̄sare buhehtinare c̄na. ã jia tina m̄sare noano buhejarō. ⁸ ã yoa paina c̄h̄u m̄sare s̄ho wahchech̄u yoah̄tina jia, m̄sare noano s̄ho wahchech̄u yoajarō. Tuhs̄u, paye barore wahtina jia, ti wahtire noano mehne yajeripohna ti, wajaro. ã yoa paina c̄h̄u m̄sare s̄ho ji m̄htahtina jia, noano mehne s̄ho jijaro. ã yoa pjac̄uoinare yoadohohtina jia, wahchea mehne yoadohojarō.

Jesu yaina jina ò sehe yoaina jiga

⁹ “S̄a basi cahma cah̄ija”, ni mah̄ono marieno m̄sa basi cahma cah̄iga. ã yoana ñaare ñ̄u yabiina jiga m̄sa. Tuhs̄u, noaa sehere ã cahmarucuga. ¹⁰ Tuhs̄u m̄sa bahana warore m̄sa cah̄ino seheta Jesu yainare m̄sa mehne macainare cah̄iga. ã yoana m̄sa basi noano cahma ño payoga m̄sa.

¹¹ Cohamac̄u cahmaare yoana, ne caparo marieno yoaga. ã yoana mari p̄htoro to dutiro seheta noano wahchea mehne yoaga.

¹² Cohamac̄u m̄sare pichacap̄u wahaborinare to ȳhdorinar̄u jira m̄sa. ã jiro m̄sa wahahto noaputiario jira. Tíre masina wahchega m̄sa. ã yoa ñano ȳhd̄na, c̄no pjaga “Cristo yare duhuri”, nina. Tuhs̄u, Cohamac̄ure ã sinirucuga.

¹³ Paye baro Jesu yainare d̄hsach̄u waga tinare. ã yoa m̄sa ya w̄h̄sep̄u c̄h̄ure masa ti s̄ch̄u noano yajeripohna tiro mehne tinare piti bocaga.

¹⁴ M̄sare ñano yoainare “Noano wahajaro tinare”, ni sini payoga. Tinare ã sini payona, “Tina ñano ȳhd̄wahnojarō”, niena tjiga.

15 Ñ yoa paina wahcheina mehne jina, m̄sa c̄h̄h̄ tina mehne wahcheha. Tuhs̄ paina ñano cahyaro mehne tiina mehne jina, m̄sa c̄h̄h̄ cahya, tiidohoga tinare.

16 M̄sa mehne macaina mehne noano jiga m̄sa. Ñ jina “Paina ȳhdoro noaina jija”, ni t̄hotuena tjiga. Õ sehe ni t̄hotuga: “Wiho jiina jija”, ni t̄hotuga. Ñ jina “Masi ȳhd̄r̄caina jija s̄a”, ni t̄hotuena tjiga.

17 Paina m̄sare ti ñano yoapach̄ta, tinare ñano yoa cahmaena tjiga. Noaa sehere yoaga, noaina m̄sa jia tiare jipihtina masa ti masihti cjihtire.

18 M̄sa bihoro puro jipihtina mehne noano jinocahga m̄sa. 19 M̄sa ȳ cah̄ina, ȳ coyea paina m̄sare ti ñano yoapach̄ta tina yoaro sehe ñano yoa cahmaena tjiga. Cohamac̄ sehe m̄sare ti ñano yoari buhiri buhiri dahrejaro tinare. Cohamac̄ yare ti joari p̄i āta ni joaa tiha: “ ‘Ȳh̄h̄ sehe m̄sare ti ñano yoari buhiri buhiri dahreriro jija. Ñ jic̄ potoc̄ta buhiri dahreih̄tja’, nina mari p̄h̄toro”, ni joaa tiha panop̄re. 20 Ñ jina ò sehe yoaga m̄sa: M̄sare ñ̄ tuhtiriro to j̄ca baach̄ ñ̄na nuga tirore. To ñ̄h̄ma yapioch̄ c̄h̄ure ñ̄na tirore sih̄ga. M̄sa ã yoach̄ ñ̄no m̄sare to ñano yoari buhiri b̄o tirohca. 21 Ñ jina paina m̄sare ti ñano yoapach̄ta m̄sa sehe tinare ñano yoa cahmaena tjiga. Tinare noaa sehere yoaga m̄sa. Ñ yoana ñaa sehere cahmaerana nica m̄sa.

13

1 Jipihtina m̄sa bui p̄h̄toa cjihtire Cohamac̄ dihta bese c̄na. Ne c̄iro p̄h̄toro Cohamac̄

to bese cūerariro mariahna. To ã cūrina ti jichu ñuna jipihtina musa tinare noano yuhtiga. ² Mari puhtoare noano yuhtierana Cohamacu to bese cūrinare yuhdurucana nija mari. Æ yuhdurucainare Cohamacu sehe buhiri dahrerohca. ³ Noainare cuichu yoahntina jierara puhtoa. Ñaare yoaina sehere cuichu yoahntina jira tina. Noaare yoaga musa puhtoare musa cuierahto cjihto sehe. Æ yoana cui si musa. Noaare musa yoachu puhtoro sehe “Noaare yoare musa”, musare ni ñunohca. ⁴ Musa puhtoa Cohamacu to cūno seheta musare yoadohhtinata jira musa noano jinocahto cjihto sehe. Wiho mejeta musa ñaare yoana pini tinare cuiga. Tina musare buhiri dahrehtina cjihtita jira. Jipihtina ñaare yoainare buhiri dahre dutiro Cohamacu tinare besere. ⁵ Ti ã buhiri dahrehtina ti jichu ñaare yoana musa puhtoare cuiga. Æ jina ño payoa mehne “Noaare yoaro cahmana yuhare”, ni tuhoturo mehne noano yuhtijihna. ⁶ Musa puhtoa ti dahrahti cjihtire Cohamacu cūre. Æ jina ti dahraare ti yoachu ñuna musa puhtoare wapa nabasainare wapara musa.

⁷ Jipihtinare musa puhtoare noano yuhtiga. Tuhsu, puhtoare wapa nabasaina cūhure wapaga musa. Æ yoa puhtoa sehe payere ti wapa dutichu cūhure wapaga. Æ jina jipihtina puhtoare noano ño payoga. ⁸ Tuhsu, paina masare wapamoena tjiga. Tinare cahño cahmana. To cahai jiinare cahñiro Cohamacu dutiare yoa pahño tuhsuñiro jira. Æ jina musa cahai jiina cūhure cahñiga. ⁹ Õ sehe nina Cohamacu dutia: “Pairo namonore wñana tien a tjiga. Numia cūhu pacoro manñore wñana

tiena tjiga. Masare wajãena tjiga. Yacaena tjiga. Paina yare goa pjaena tjiga”, ni yahura to dutia. Paye dutia cãhũ jira. Ti ã jipachũta cãno dutiare m̄sare yahui tai nija. Tí dutia cãno dutia to jipachũta tí dutiare yoana Cohamacũ dutiare yoa pahñona nija mari. Tí dutia õ sehe nina: “M̄ basì m̄ cahĩno sehetã m̄ cahai jiina cãhũre cahĩga”, nina. Tí dutiare yoana Cohamacũ dutiare yoa pahñoina jina nina. ¹⁰ M̄sa cahai jiinare cahĩna, tinare ñano yoasi. ã jina tinare cahĩna, Cohamacũ dutiare yoa pahñoinata jira m̄sa.

¹¹ ã jina carĩna yoaro sehe jiena tjiga m̄sa. Noano wacũ masiga. Jesure noano wacũ cohtaga. Jesu marine to tjua ta naahto mahanocã d̄hsatjiãna. Tirore mari coã wacũ tua d̄cachũ Jesu marine to yũdoro tahto mahanocã d̄hsamare. Mipũ pinihtare cahacã waro jira to tahto. Ahri yũ nirire masina m̄sa. ¹² Mipũre ñaina ya dacho jira. To tahto mahanocã d̄hsara. Tíre masina, buhiri tichũ yoare, nahitiano yoaro sehe jiare duhu pahñojihna mari. ã jina Cohamacũ cahmaa sehere yoajihna mari. ã Cohamacũ yare yoana, ñaare duhu pahñonahca mari. Ahri dachore payũ ñaa baro jichũ, ñami yoaro sehe jira. Wiho mejeta Cristo to tachũ, ñami yoaro sehe jiro pihtia waha, pa dacho, buhria m̄ja taro yoaro sehe waharohca. Surara coma suhtiro to sãa d̄cataro sehetã Cohamacũ ñaare to d̄cataare noano c̄jua pahñojihna mari. ã tíre c̄jana ñaare duhu, Cohamacũ cahmaa sehere mari yoajihna. ¹³ ã jina Jesu to tahtore wacũ cohtaina jina, noaa sehere yoajihna. Bose n̄m̄rine yoana ñano

yoaena tjijihna. Tuhsu, cahaena tjijihna. ã jina numia mehne ñano yoaina, paina mehne ñano yoaina, cahma sayoina jiena tjijihna. M̄sa numia c̄hu m̄sa mehne ñano yoaena tjiga. ¹⁴ Wiho mejeta Jesucristore p̄htoro tina, tirore ȳhtiga m̄sa. ã ȳhtina to jiro seheta jiga m̄sa. ã jina ñaare m̄sa goa p̄jaa sehere yoaena tjiga.

14

M̄sa coyeare Jesu yainare “Ñano yoaa nina”, ni yahuwajaena tjiga

¹ Jesure wacũ tuarirore to noano wacũ tuaro d̄hsasinichu ñ̄na tirore ji coaro mehne cahmaga. To ã jiriro jichu ñ̄na “Ne masierara m̄hu” ni, tiro mehne cahmasayoena tjiga. ² “Jipihtiare chu masija ȳhu”, ni t̄hotura paina. Paina sehe Jesu yare noano masierasinia wahiquinare ch̄eraina, toaa dicha dihtare ch̄ra. ³ Jipihtiare ch̄ina sehe toaa dicha dihtare ch̄inare ñ̄ tuhtiea t̄jijaro. ã yoa toaa dicha dihtare ch̄ina c̄hu jipihtiare ch̄inare “Ñano yoaa nina”, ni cahma yahuwajaea t̄jijaro. Jipihtiare ch̄ina sehe Jesure wacũ tuaina ti jichu Cohamacu tinare to yaina yoa tuhsare. To yaina ti jichu ñ̄na wahiquinare ch̄eraina sehe tinare yahuwajaea t̄jijaro. ⁴ Jesure wacũ tuaina Cohamacure dahra cohtaina dihta jira. Ti ã jichu ñ̄na m̄sa tinare yahuwaja masierara. Jesure wacũ tuaina to cahmano sehe ti quihõno yoaerachu ñ̄no tiro dihta ti p̄htoro jiro, tíre yahu poto masina. To cahmaare quihõno ti yoachu c̄hure tíre yahu masina tiro. ã jiro tiro sehe

to yainare “Ñano yoare m̄h̄”, ni yahuhtiro jirohca. ã jiro tirore dahra cohtainare noaa dihtare yoarucu masich̄ yoariro jira Cohamac̄.

⁵ Cãina cãa dachori cua pisaro mehne Cohamac̄re ti ño payohti dachori cjihtire cj̄ara. Paina sehe, “Dohse jiri dachore Cohamac̄re ño payoch̄, noana”, ni t̄hotu, ño payoina jira. Tina cãno potori ã yoaeraina jipahta jipihtina õ sehe ni t̄hotujaro: “Jesu to cahmano seheta noano yoana nija”, ni t̄hotu masijaro. ⁶ Cãiro cãa dachori cua pisaro mehne Cohamac̄re ti ño payoa dachorihi Cohamac̄re ño payoro, tiro c̄h̄ quihõno ño payoro nina. Tuhs̄ jipihtiare ch̄riro ch̄rota, Cohamac̄re “Noana”, ni wahche payora tiro. ã jiro tiro c̄h̄ Cohamac̄re ño payorota nina. ã yoa paio sehe cãa ch̄are ch̄erara, Cohamac̄re ño payoro. Tiro c̄h̄ Cohamac̄re “Noana”, ni wahche payora.

⁷ Tuhs̄, mari cahmaa dihtare yoaina ne ji masieraja mari. Cristo jira mari p̄htoro. ã jiro mari catich̄ mari yariach̄ c̄h̄re mari p̄htorota jira. ⁸ Mip̄re mari catisinino puro Cristo yare yoahcina j̄ja mari. To yaina j̄ja. Mari yariari baharop̄ c̄h̄re to yainata jinahca. ã jiro mari catich̄ mari yariach̄ c̄h̄re Cristo mari p̄htoro jira. ⁹ ãta jira. Cristo yaria masa m̄jaha catiinare, ã jich̄ yariaina c̄h̄re ti p̄htoro jiro taro.

¹⁰ ¿Dohseana tana m̄sa coyeirore Jesu yairore “Ñano yoaro nina”, ni yahuwaja duajari m̄sa? ¿Dohseana tana m̄sa coyeirore t̄ diho c̄ duajari m̄sa? Mari jipihtina Cristo panoi mari ducuch̄

tiro sehe mari yoarire masi pahñonoriro jiro, marine beserohca noainare, ñainare. To ã besehtiro to jichu m̄sa coyeirore “Ñariro jira”, ni yahuwajaena tjiga. ¹¹ Cohamacu yare ti joari p̄i õ sehe ni joaa tiha:

“Õ sehe nire mari puhtoro: ‘Yuhu catiriro jija.

Ã jicu õ sehe ni quihõno warota yahuja m̄sare.

Jipihtina yu panoi na tuhcuca caha suhca.

Ã na tuhcuca caha su, “Noariro, tuariro jira m̄hu” ni, yuhure ño payoahca’, nire mari puhtoro”,

ni joaa tiha. ¹² Ã jiro jipihtina mari yoarire Cohamacu siniturohca marine. “¿Dohse yoana ã yoari?” ni siniturohca. To ã sinituchu yuhtiro jica marine.

M̄sa coyeirore ñano yoachu yoarena tjiga m̄sa

¹³ Ã jina mari mehne macainare “Ñaina jira m̄sa”, ni cahma yahuwajaena tjijihna. Ã yoana mari coyeirore Jesu yairore dojomehnena tjijihna “Jesure wacũ tua duhuri”, nina. ¹⁴ Yuhu Jesucristo yairo jicu, ahri yu nihtire noano masija yuhu. Yuhu sehe jipihtia chure yu chuchu yu churi buhiri, buhiri mariahna. Wiho mejeta paio sehe “Ahri chure chucu buhiri tii nica yuhu”, ni tuhoturiro sehe churo, potocãta buhiri tiriro jira. ¹⁵ Tí potocã tjira. Paina ti sio, chura barore m̄sa chuchu ñno, m̄sa coyeiro ñu cũ churo, “Cue, ñano yoai nica yuhu”, ni pjíro tuhotuboca tiro. Tirore ã ñu cũ chuchu yoana, tirore cahina nieraca m̄sa. To sio, chura barore m̄sa chuchu, tiro cãhu ñu cũ chuboca. Ã churo “Ñano yoai nija”, ni tuhoturo Cristore duhuboca. M̄sa coyeiro yaro jiboriro

cãhure yariari jire Cristo. ã jina “Cristore duhuri”, nina tirore ñh cũ chuchh yoaena tjiga. ¹⁶ ã jia “Ahri sã yoari noa nica”, m̄sa ni tãhotuchh paina m̄sare yahuwajaboca. Ti ã yahuwajachh ñhna m̄sa ã yoarire yoa namoena tjiga, “Yahuwaja namori”, nina. ¹⁷ Cohamacch sehe mari pãhtoro jira. To ã jichh mari chha, mari sihnia cãhã ã jinocaa nina. Wiho warota jira. ã jia mari pãhtoro to dutiare, noaa cãhure mari yoachh tí waro jia nina. Paina mehne mari noano jinocachh cãhure noaa waro jia nina. Tuhsch, Espíritu Santo yoado-hoa mehne mari wahchechh noaa waro jia nina. ¹⁸ Tó seheta Cristo yare yoarirore ñhã Cohamacch, masa cãhã “Noano yoare m̄hã”, niahca.

¹⁹ Tó seheta yoajihna mari pinihta noano mari jinocahto cjihtore, mari basi mari cahma yoad-ohohto cjihtore. ã yoana Jesure wacũ tua namonahca. ²⁰ Pairo Jesu yairo to chh dutierari cjirire m̄sa chuchh ñhno tiro sehe ñh ji coeraro Cohamacch yare cohãboca. ã jina tíre chhena tjiga. Potocãta jipihtia chha noaa chhata jira. Tí ã jipachhata paye barore mari chuchh pairo “Ñaa chha jica ahri”, niriro jiparota ñh cũ chhoboca. ã chhro ñano yoaro nica tiro. ã jina marine to ñh cũ chuchh, mari cãhã ñano yoana nija. ²¹ Wahiquina dihire m̄sa chuchh ñhno, vinore m̄sa sihnichh ñhno, pairo Jesu yairo “Tíre chhch ñano yoai nica yuhã”, ni tãhoturiro jiparota tiro cãhã ñh cũ, chh sihniboca. ã ni tãhoturiro pinihta chh sihnino ñano yoaro nina. ã jina tiro to ñano yoaer-ahto sehe Jesure to wacũ tua duhuerahto sehe wahiquina dihire, vino cãhure m̄sa sehe m̄sa

duhuchu noa nina. ²² “Jipihtiare chu masija”, ni t̄hotuna, tíre Cohamacu dihtare yahuga. Ñaare yoerariro, “Noano yoai nica yah̄u”, ni t̄hoturiro wahcheriro jira. ²³ Pairo sehe “Ahri ch̄are ch̄ucu ñano yoai niboca yah̄u”, ni t̄hoturiro jiparota tí ch̄are ch̄uro, buhiri tiriro jira tiro. “Ahrire ch̄ucu potoc̄ata noaare yoai nija”, ni t̄hotuerara tiro. Ñ ni t̄hotueraro tíre ch̄uro, to ch̄uri buhiri buhiri tira tiro. “Noaare yoai nija”, ni t̄hotueraro tíre yoaro, buhiri tira tiro.

15

Mari cahai jijnare noano yoajihna

¹ Mari Cohamacure noano wacū tuaina sehe wacū tuaera cureinare yoadohojihna. Ñ yoana mari ya cjihti dihtare yoaena tjijihna. ² Ñ jina mari cahai jijnare Jesu yainare noano yoajihna ti noano jinocahto cjihtore, Cohamacure ti noano wacū tua namohto cjihtore. ³ Cristo sehe to ya dihtare yoeraha. Ñta nina Cohamacu yare ti joari p̄i. Ñ sehe ni joaa tiha: “Cristo ñ sehe nire Cohamacure: ‘M̄h̄u sehere ñano durucuborina yah̄u sehere ñano durucure’, nire Cristo Cohamacure”, ni joaa tiha panopure. Ñ ñano ti durucuriro jiro Cristo to Pucuro ya sehere yoaro niha. ⁴ Panopu Cohamacu yare ti joari p̄i tina joaa tiha mari noano buhehto cjihtore. Ñ jina tí p̄re buhena wahcheja. Ñ buhena mari ñano yah̄duna c̄no pjana, noano mari yah̄d̄h̄tore cohtanahca. ⁵ Cohamacu m̄sare tuachu yoariro wahchechu yoariro m̄sare jipih̄tinare c̄no potori noano jichu yoajaro, Cristo to cahmano seheta. ⁶ Ñta yoajaro tiro m̄sa jipih̄tina

cãno potori Cohamacure mari puhtoro Jesucristo Pucurore “Noariro, tuariro jira”, ni msa ño payohtore.

Judio masa jierainare noaa buheare yahu ducaha

⁷ Cristo marine to yoariro seheta msa mehne macainare noano cahma piti bocaga. Msa ã yoach ña “Potocãta Cohamacu noariro jira”, ni ñahca masa sehe. ⁸ Msare ahrire niita nija: Judio masare yoadohohtiro cjihto taha Cristo. Cohamacu tirore warocaro judio masa sã ñachusma cjiropare to ni yahuriro cjiro seheta yoaro niha. Tíre to yoari cjiire masare masichu yoahitiro cjihto taha Cristo. ⁹ Masare Cristo to yoadohochu Cohamacu pja ñno nire tinare. To ã pja ñchu judio masa jieraina cãhu Cohamacure “Noariro, tuariro jira” ni, ño payora mipare. Tina cãhare to yaina jichu yoaro taha Cristo. Cohamacu yare ti joari pui ãta ni joaa tiha:

“Cristo õ sehe niha Cohamacure: ‘Judio masa jieraina cahai mchare “Cohamacu noariro, tuariro jira”, ni ño payohtja.

Ã jicu tina cahai basacu m ya cjihtire basaitja’, ni joaa tiha panopare. ¹⁰ Tuhs, õ sehe ni joaa tiha tjoa:

“Cohamacu to beserina judio masa mehne cahma wahchega msa cãhu judio masa jieraina”, ni joaa tiha panopare. ¹¹ Tuhs, õ sehe ni joaa tiha tjoa:

“Judio masa jieraina jipihtina Cohamacure ño payojaro.

Ã jia jipihtiro macaina tirore ‘Noariro, tuariro jira’, ni ño payojaro”,
ni joaa tiha. ¹² Ã yoa Isaia cjiro cãhũ õ sehe ni joaa tiha:

“Jesé panamino ji turiariro tarohca.

Ã taro judio masa jieraina bui pãhtoro jirohca tiro.

Ã jia tina sehe tirore wacũ tuaa, tinare pichacapũ wahaborinare to yũdhohtore masi-ahca tina”,

ni joaa tiha panopũre.

¹³ Cohamacũ marine baharopũ to yũdhohtore wacũ cohtachũ yoariro noano mũsare wahchechũ yoajaro. Tuhsũ, mũsare Jesure wacũ tuainare noano jinocachũ yoajaro tiro. Mũsare to ã yoachũ mũsare to yũdhohtore Espíritu Santo to tuaa mehne wahchea mehne wacũ cohta namochũ yoajaro.

¹⁴ Ahrire mũsare yũ yahuhtire noano masija. Mũsa sehe noaina jira. Tuhsũ, Jesu yare noano masina mũsa. Ã masina mũsa basi noano cahma yahu, buhe masina mũsa. ¹⁵ Mũsa ã masiina mũsa jipachũta cãa tahari ahri pũpũre mũsare cuiro marieno noano yahu pahño joahi tíre mũsa boerahto sehe. Cohamacũ yũhũre cahño mũsare buhe dutiro cũre yũhũre. Ã jicũ to cũriro seheta yoaja, mũsa tíre boerahto sehe. ¹⁶ Yũhũre to ã cũchũ, sacerdote to yoaro sehe yoaja yũhũ. Ã yoachũ, Jesucristo yare noaa buheare judio masa jierainare buheja yũhũ. Yũ ã buhechũ tãhoa, tina Jesure wacũ tuara. Tina Jesure wacũ tuainare yũhũ sehe sacerdote wahiquinare wajã jũ mũo Cohamacũre yũ waboriro seheta, tinare “Mũ yaina

jira”, nija Cohamacure. Yu ã niinare Espíritu Santo sehe tinare Cohamacu yaina cjihti jichu yoara. Ti ã jiina jichu ñuno, Cohamacu sehe ji coaro mehne tinare ñahanohca.

¹⁷ Cohamacu to buhe duti cūriro jichu Jesucristo to yoadohoa mehne yu yoari cjirire wahchea mehne yahuja musare. ¹⁸⁻¹⁹ Tuhsu, ahri pinihtare musare pototi yahu duahi. Yu yahua yu mu saro yu yahua ne jierara. Paina judio masa jierainare Cristo to yoadohoa mehne tinare yu buhechu tuhoa, yu yoarire ñua, ã jia Jesu tuua mehne yu yoa ñorire ñua, Espíritu Santo to tuua mehne tina Cristore wacū tuare. Jerusalēpu wahma yu buhe ducari baharo jipihtia macariperu buhe wahcāhi. Pu Ilirico yahrapu cūhure Cristo ya buhea noaa buheare buhei sui. ²⁰ Cristo yare masieraina dihtare noaa buheare tuaro buhe duahi, yuhu mehne macaina ti buherinapure buhe duaeracu. ²¹ Æta ni joaa tiha Cohamacu yare ti joari pūi:

“Panopu tirore ne tuhoeraina cjiri tirore masi-ahca.

Æ yoa tirore ne tuhoeraina cjiri to yare noano tuhoahca”,
ni joaa tiha Cohamacu yare ti joari pūi.

Paulo Romapu to wahahtore yahuha

²² Æ jichu jipihtiro macainare buheriro jichu payu tahari musa cahai waha duapaihta waha masiera tihi. ²³ Mipu pinihtare ahri yahparipure yu dahraa pihtia wahahre. Æ jichu payu cūhmari musa cahapu waha duariro jichu musa cahapu wahihtja. ²⁴ España pu wahacu, musare tói ñu yuhdhaihtja. Æ yocacu musa mehne wahcheihtja.

Tuhsu, musa mehne mahanocã yu jiri baharo yuhure musa yoadohoa mehne Españaru yuhu wahcãihtja. ²⁵ Mipure Jerusalẽru wahasinii tai nija. Tõ macainare Jesu yainare yu coyeare niñerure naasinii wahai nija. ²⁶ Macedonia yahpa macaina, Acaya yahpa macaina cãhu noano mehne Jesu yainare Jerusalẽru jiiinare pjasuoinare niñerure warocahre tinare yoadohoa. ã jicu tinare tíre wai wahai nija. ²⁷ Tí niñerure waa, noano mehne wahre tina. Ti ã yoachu noa nina, yu tãhotuchu. Tinare judio masa jierainare judio masa sehe Cohamacu yare buhe muhtare. ã jia tinare to yuhdohto cãhure buhe muhtare judio masa. Ti ã buhechu ñicu Macedonia macaina Acaya macaina mehne judio masare ti yoadohochu noa nina yuhure. Tinare ti buheri wapa yoaro sehe jira tí, yu tãhotuchu. ²⁸ ã jicu Jerusalẽ macainare tí niñerure wa tuhsucu Españaru wahaihtja. Tõru wahacu musare ñu yuhduaihtja. ²⁹ ã yoa musa caharu yu wahachu Cristo yare musare yu buhechu tiro musare noano yajeripohna tichu yoarohca.

³⁰ Yu coyea, mari puhtoro Jesucristore wacũ tuara musa. ã yoa Espiritu Santo to tuaa mehne painare cahina musa. ã jiina jina yuhu cãhure tuaro sini payoga Cohamacure. ³¹ Õ sehe ni sini payoga: Judea yahpa macaina Jesure ño payoeraina yuhure ti ñano yoa duachu Cohamacu yuhure to ñu wihbohto sehe sini payoga. Tuhsu, Jerusalẽ macaina Jesu yainare niñerure yu wabasachu tina tíre wahchea mehne ti ñahahto sehe sini payoga. ³² Musa ã sinichu

Cohamacu cahmachu wahchea mehne musa cahapu wahaihtja. ã jicu musa mehne jicu wahchea mehne soihtja. ³³ Cohamacu marine noano jinocachu yoariro musa mehne jirucujaro.

16

Paulo noa dutiha

¹ Mari coyeacoro Febe wama tiricoro musa cahapu waharo taro nina. Ticoro Cencrea wama tiri macai Jesu yainare cahmachuinare yoadohoricoro jira. ² ã jiro payure yoadohoricoro yuhu cãhure yoadohoricoro jihre ticoro. Tuhsu, mari puhtoro Jesu yacoro jira. ã jina ticorore noano mehne musa mehne ji dutiga. Tó sehetã yoaro cahmana marine Jesu yainare. ã yoana ticorore paye baro to maerachu ñuna ticorore waga musa.

³ Aquila, to namono Priscila cãhu noajaro. Jesucristo yare yu buhechu tina cãhu yuhu mehne dahrare. ⁴ Tinare mahano wajãmoñore paina yuhure ti wajã duachu ti yoadohori buhiri. ã jicu tina mehne wahcheja yuhu. Tuhsu, judio masa jieraina Jesu yaina jipihtina tina cãhu tina mehne wahchera. ⁵ Aquila ya wuhai cahmachuina cãhu Jesu yaina noajaro. Yu cahiro Epeneto cãhu noajaro. Tiro Asia yahpa macariro tói jiro Cristore wacũ tua muhtariro jire. ⁶ María cãhu noajaro. Ticoro musa mehne tuaro dahrahe. ⁷ Yu coyea Andrónico, Junia cãhu noajaro. Peresui yu jichu tinata yuhure piti tiina jihre. ã jia yu pano Cristore wacũ tua muhtare tina sehe. Paina Jesu to cõrina sehe tinare “Potocãta noaina jira”, ni durucura.

⁸ Ampliato cãh_u y_u cahĩriro Jesu yairo jira. Tiro noajaro. ⁹ Urbano cãh_u noajaro. Tiro cãh_u mari mehne Cristo yare dahrahe. ã yoa y_u cahĩriro Estaqui noajaro. ¹⁰ Apele cãh_u noajaro. Tiro potocãta noano Jesure wacũ tuara. To yoarire ñuna tíre masija mari. Tuhs_u, Aristóbulo ya wãh_u macaina jipihtina to namono to pohna cãh_u noajaro. ¹¹ Y_u coyeyro Herodiõ noajaro. ã yoa Narciso ya wãh_u macaina Jesu yaina noa pihtinocajaro. ¹² ã yoa Trifena, Trifosa cãh_u noajaro. Tí numia mari pãhtoro Jesu ya dahraare yoara. Mari cahĩricoro Pérside cãh_u noajaro. Ticoro mari pãhtoro yare tuaro yoara. ¹³ Rufo mari pãhtoro Jesure noano wacũ tuariro, to yare noano yoariro noajaro. To pocoro cãh_u noajaro. Ticoro y_u poco yoaro sehe jiricoro jira. ¹⁴ Asíncrito, Flegonte, Herme, Patroba, Herma, paina Jesu yaina tina mehne macaina cãh_u noajaro. ¹⁵ Tuhs_u, Filólogo, Julia, Nereo, to bahoro cãh_u, Olimpa, paina tina mehne macaina cãh_u Jesu yaina noajaro.

¹⁶ ã yoa m_usa mehne macainare piti bocana, noano mehne piti bocaga. Jipihtina Jesu yaina jipihtiro macaina m_usare noa dutira.

¹⁷ Y_u coyeya, m_usa mehne macaina cãina m_usare cahma ñ_u tuhti, cahma tju wach_u yoaina jira. ã jia m_usare Jesu ya buheare dojomehna. ã jina tó sehe yoainare ñuna noano yoanohb_u, “Dojomehneri”, nina. ã yoainare piti tiena tjiga. ¹⁸ Tó sehe yoaina mari pãhtoro Jesucristo yare yoaerara. Ñaare ti goa pjaa dihtare yoara. Tuhs_u, noano tãho ji coaro dero mahño buhera noano masierainare. Ti ã mahño ch_u tinare noano tãhora.

Ã jina ã yoainare piti tiena tjiga m̄sa. ¹⁹ M̄sa sehe Jesure noano yuhtiina jira. Tíre jipihtina masina. ã noano yuhtiina m̄sa jich̄ wahcheja yūh̄. ã jic̄ noano m̄sa yoahcore m̄sa masich̄ cahmaja yūh̄. ã yoa ne ñaare yoaeraina m̄sa jich̄ c̄h̄re cahmaja yūh̄. ²⁰ ã jiro Cohamac̄ marine noano jinocach̄ yoariro mahanocã baharo wat̄no Satanare yuh̄d̄ucach̄ yoarohca m̄sare. ã yoa mari puhtoro Jesucristo m̄sare noano wahach̄ yoajaro.

²¹ Timoteo yū piti m̄sare noa dutira. Yū coyea judio masa c̄h̄, Lucio, Jasõ, Sosípatro m̄sare noa dutira.

²² Yūh̄ Tercio ahri p̄re Paulore joabasariro jija. Yūh̄ Jesu yairo jic̄ m̄sare Jesu yainare noa dutija.

²³ Gayo ya w̄h̄i jinocai nija yūh̄ Paulo. To ya w̄h̄i Jesu yaina cahmachuna. Tiro c̄h̄ m̄sare noa dutira. ã yoa Erasto ahri maca macaina puhtoare niñerure ñ̄ wihbobasariro m̄sare noa dutira. Mari coyeiro Jesu yairo Cuarto c̄h̄ m̄sare noa dutira.

²⁴ [Yū coyea mari puhtoro Jesucristo m̄sare jipihtinare to cah̄a mehne noano yoajaro. ãta yoajaro.]

Paulo Cohamac̄re ño payoro joa batoara

²⁵⁻²⁷ Mari puhtoro Jesucristo ya buhea mehne noaa buhea mehne Cohamac̄ m̄sare tirore wac̄ tua namoch̄ yoa masina. Panop̄re tí buhea noaa buhea ne masare yahuerari buhea jimaha. Mip̄re Cohamac̄ yare yahu muhtaina cjiri ti joari cjiri mehne tí buheare yahua jira. Yūh̄ c̄h̄

tíreta buheja. Tí buheare Cohamacuã ã jirucuriro to yahu site dutiro seheta jipihtiro macainapũ mipũre masina. Tí buheare tirota yahu dutiha masa tirore yũhti, ti wacũ tuahto cjihto sehe. Æ jina tirore “Potocãta noariro, tuariro jira mũhũ”, ni wahche payojihna. Tiro cãirota Cohamacuã dihta noano masi pahñoriro jira. Jesucristo to yoadohoa mehne Cohamacuãre ã ño payorucujihna mari. Æta yoarucujihna.

Cohamacu Yare Yahari Tjuel New Testament in Guanano

copyright © 2007 Wycliffe Bible Translators, Inc.

Language: Guanano

Translation by: Wycliffe Bible Translators, Inc.

Copyright Information

© 2007, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guanano

© 2007, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

